

~~43~~
33

HARVARD COLLEGE LIBRARY
FROM THE
HARVARD - YENCHING
INSTITUTE
SEP. 30 1929

~~78~~
Ch L 5570.2928
A

5237.78/2928

明詩綜卷八十二

小長蘆 朱彝尊 錄

月潭 朱明儀 緝評

周 箕 二十九首

箕初名筠字青士別字簞谷嘉興布衣有采山堂集

靜志居詩話青士遭亂棄舉子業受屢賣米有括故家遺書連船鬻於市者買得一船積樓下每日中交易筐筥斗斛權衡堆滿肆讀之糠粃中其為詩句敦字琢不輕襲前人片語胸無柴棘急人患難視朋友如一身人或忘大德而思小怨者不以實諸懷也晚年詩趨率易好與浮屠道士游題詠極多嘗醉書五言云似士不游庠似農曾讀書似工不操作似商謝奔趨立言頗突兀應事還猶疎飢凍不少顧吟詩作歡娛可當一幅寫照也

和李子見贈作

屠羊亦有肆賣酒亦有漿處困無賢豪在短遺其長眷
言歷饑渴黽勉方自將君子采葑菲遺我瑤華章遂令
樗櫟姿文采亦得揚朱子磊落士揆藻皆稱良繆生秉
高尚志潔言益芳泥塗惜偃蹇韞璞潛輝光嗟余共晨
夕身隱名莫彰鮑叔苟不遇寸心誰能詳

宿揖山樓

偶為寂寞游遂得高寒境天浮長泖闊雲落橫峰冷出
林鐘磬聲繞檻星河影弱喪未知歸吾衰當猛省

夜眺

中夜松徑黑不知山月高迴風動林木萬竅皆怒號宛
如泛孤舟危坐驚波濤濕螢墮遠水野鶴鳴寒臯人生

亦何嘗哀樂隨所遭長歌望河漢何以解鬱陶

結交

弟兄本同氣所稟或有殊一朝意氣乖覩然如道塗結
交乃異姓反覆誠可虞肝膽空自許安知非見誣徒然
事談笑緩急何所須嗟哉今之人結交良已愚

過白蓮寺觀銅堦

是錢鏐時故物蔣子
僧果得之施鎮此寺

銅堦如片瓦鎔鑄何工巧隆起欄楯形圖識尚可了知
是五代物厥惟錢王造是類萬有千聚散不可保幾歷
兵火災存者今已少蔣生偶獲之什襲逾重寶施舍鎮
精廬此意實微眇誦公喜我至出示光尚皎窪處填黃
金顯見諸相好屠兒額偏廣下放刀仗小一者既若斯

諸餘皆可曉

詩話宋周文璞方泉集有姜堯章金銅佛塢歌云白石招我入書齋使我速禮金塗塢我疑此塢非世有白石云是錢王禁中物上作如來捨身相飢鷹餓虎紛相向拈起靈山受記時龍天帝釋應惆悵形模遠自流沙至鑄出今回更精緻錢王納土歸京師流落多在西湖寺錢王本英英雄人白蓮花現國主身蛇鄉虎落狗脚朕何如紅袍玉帶稱功臣天封拆開即退聽兩浙不聞笳鼓競歸來佛子作護持太師尚父尚書令一枚傳到白石生生今但有能詩聲同袍秦外鉅師兄哦詩禮塢作佛事同喫地爐山芋羹何曾熏陸綺牀供但見相輪銅綠明哦詩禮塢猶未畢蘆葉低飛山雨濕曹勛松隱集有淨慈創塑五百羅漢記略云淨慈山光孝禪寺錢氏時曰永明寺慈化定慧師道潛居之嘗請於忠懿王求塔下金銅羅漢像會王夢十六大士從師而行密符其請因如所求歸于精舍是當時銅塢率歸淨慈矣近吾友青士忽於嘉禾白蓮僧寺見之別是一片乃鑄放下屠刀立地成佛故事

次韻答吳日千

少壯不自勤垂老饑凍逼顧慙蒲柳姿難與雪霜敵誰言失東隅收之桑榆夕但計一瓦全寧問十碎壁讀書

不成名在世奚損益交游率欺給骨肉每戕賊自非生憂患於何表勞績延陵有高風早得望顏色介石性所操詎肯妄衣食無慙一瓢飲高卧三畝宅桓榮亦儻然取效稽古力時命苟我違賢豪困無策素絲爲玄黃岐路復何適同病豈不懷貽詩解煎迫

雜感

去年學造蓋亢旱日已多今年學造車陸地忽成河旱潦會有時我業則孔訛蒼蒼旣無私命也將奈何

擬古贈姜子

客從遠方來駕言往前綏入門奉顏色乃我故所思所思亦已久竊擬瓊樹枝諒節固所欽况復攜華詞同方

易為感遇合誠無時勿言相見晚傾蓋良在茲幽人履
貞吉志士循芳規道義苟不愆紛華亦奚為與君崇令
名庶幾副所期但恐分手去何當復追隨

同諸子集指月菴是日立春

落日步寒郊清溪望中闊眷言二三子精舍喜重謁庭
梅行漸舒堦草亦微發冰霜雖滿林春意辨毫末開歲
尚逾旬人事頗倉卒聊乘俄頃閒神氣得超越清談不
知疲宰勃深理窟予忝馬齒加貧賤苦筋骨功業無早
成詞華敢輕伐執鞭既覩顏獻璞還遭別茅齋歸去來
清醕為君竭

登洞山過無閔菴

洞山近湖濱驚濤走其下雙林隱青蒼上有支公社肅
客汲寒泉軒牕甚瀟灑指點林外觀風帆驚如馬頃時
画舫過詎非公等者吾徒本乘興巖壑肯輕捨已裹十
日糧要令此心寫山中橘柚熟可勿遽歸也

贈友二首

猗猗龍門枝八尺何蕭森竭來遇良工采斲為素琴絃
以朱絲絃清徽間黃金一彈再三歎四顧無知音知音
世豈乏道遠難重尋平生慎交游始願方自今何知歲
月馳涼颺起中林愴焉感化別淚下沾衣襟努力當及
時慰此千里心

君子應世務言行為樞機輕發不一慎前功悉皆隳飲

明言集卷八十二
四
食雖宴樂禍患常相隨所失毫末間駟馬不可追三緘
古有戒捫舌其庶幾復彼白圭章畢身以爲期

晚登紫微山

行役喜暫休偶泊東山麓杖策登崇岡聊復肆遐矚眇
然百里秋蕭蕭方落木曠野生夕風天地寒始肅林開
海上峰隱見遞起伏崇壇表我煥黎庶走威福徒勞盡
脂膏金碧光草木隔嶺聞鳴鐘殷殷動空谷際夜煙嵐
收初月映深竹

春日臯亭訪靈章禪師巢枸居

探奇入艱阻杖策西山巔盤回出榛莽始達精廬前微
光射虛堂夕照猶西懸遺薪滿林臯爨室通源泉愛此
山中居所適安自然我來雪初霽巖壑開晴煙叢梅倚
絕壁皎潔有餘妍境絕思亦清心止如澄淵清談至分
夜擁火不得眠晨鐘發前嶺月落空寒烟

游爻山

清秋氣森爽一水搖空明樂哉茲日游遂我滄浪情透
迤轉林麓空翠忽杳冥隆隆見山脊隱若飛梁橫得從
緇錫侶復與賢豪并靈境固有待高懷亦相成山房隱
松柏下視原隰平連岡旣窈窕前峰復崢嶸泠泠乳泉
滴藥井莓苔生神迹逝已久茲山猶著名幽棲何當遂
使我塵慮輕

曉行曲

城頭月落雞初鳴鼓四起坐鼓五行霜華滿野馬蹄滑
出門莽莽雲山闊閨人挽衣雙淚流子啼女號愁復愁
誰能骨肉更相顧萬里揚鞭且西去

沈山子云極
類高青丘

題沈石田溪山圖

平生頗愛溪山游溪山到處皆淹留邇來苦為塵土縛
衣食奔走無時休眼明得見此圖画心境忽覺成清幽
重山疊嶂雲出沒修篁灌木風颭颭邨農野老各有務
壺漿餉饁來田疇樵人腰斧漁布網竊笑各自為身謀
始歎人生少閒豫况復濁世多戈矛先生筆墨不易致
真蹟豈但千金求吾生雖不識画理紙上但喜烟嵐浮
平波浩淼遠無際五湖萬里來扁舟同憂相見世尚有

不遺故舊今無儔古人貴自食其力種瓜去逐東陵侯

紫微山歌送胡天岫移居

東風吹煙綠芳渚送爾移家復何處紫微山色嵐翠重
蘭楫遙看此中去此中高隱君故人藥爐茶竈歡相親
陰崖茅屋結未久陽谷蘿軒構尚新昨夜淙淙山雨急
瑤草奇花盡沾濕今朝君去天更晴愁絕青峰向空立
與君本擬結同心那知離隔共沉吟我留市井人爭羨
君傍雲山詎易尋世間萬事真難料智士翻為愚者笑
樵李行歌且負薪渭濱不遇空垂釣紫微山北讀書臺
朝發蒲帆日暮迴為道相思難解釋扁舟月下更能來

醉後率爾作

磨甑作鏡鏡不明石田欲耕不受耕貧家讀書那得成
雞鳴狗盜孟嘗客賺人已出秦王城

雨牕言懷

蕭蕭雨若絲髮微中庭落葉高下飛幽人獨坐愁掩扉
此生虛擲良可惜修名未立髮早白回也屢空非計失
牀頭有琴復有書朝彈暮讀情何如中懷慷慨那得舒

繆天自云三句一轉韻自
今嘉州後鮮有効之者

銅雀伎

可歎漳河水仍經鄴下臺金鳧終寂寞銅雀舊飛來舞
罷羅衣卷香風總帳開西陵松柏晚歌吹有餘哀

屈五約游山陰作

五嶽游曾遍三年客未還平生詩賦在重擬渡江關日
鑄峰何處冬青樹可攀遙傳有雙鶴更放沃州山

哭然公

遠公釋門老獨卧孤峰雲隱德世莫見高風余夙聞松
杉手自種虎豹時為羣歎息永徂謝山堂空夕曛

采蓴

細蔓柔柔弱輕舟箇箇添參差方未已采摘定無嫌入
箸銀絲滑行廚翠釜黏為憐滋味別更下水晶鹽

懷舊為亡友王翊作

南浦驚心憶往年送君獨上子猷船烏衣舊巷看猶在
馬首長塗信可憐烟樹瘴深過嶺日寒潮風急渡江天

寧知陸賈遺歸橐空為王孫給墓田

九日客中寄弟

九日離亭雨三年異國愁故園兄弟在為我一登樓

城南尋鍾子不值

由拳城外草萋萋放鶴洲南夕照低惆悵相尋不相見
狂歌一曲蠡湖西

過屠東蒙邨居

白蓮寺北水東流白鹿涇西卜宅幽山雨欲來村樹黑
滿湖菱葉罨漁舟

夜入青芝塢訪靜遠禪師

雲合山根落照低亂峰無數客心迷黃昏暗入松楸路

何處鐘聲是虎溪

繆永謀 五首

永謀一名泳字天自又字于野嘉興縣學生有

苻谿集

詩話天自韶年深懲公安景陵流派一以蕭統徐陵所選及左克明郭茂倩之書規模傳習及周覽四方風氣雖殊終不改度可謂有君子之

守者

述懷

幽居抱長懷恒苦無近虞翹首百年內不足當踟躕吾
黨二三子頗言心相孚振策無駑駕懸乘皆驪珠結帶
從行游風波忽相渝失路須臾間不復同馳驅聞道初
未深託俗非良圖安知阮生涕乃爾雪窮途

擬古 二首

步出城東隅言登北邙阪累累誰家墳淒淒白日晚斷
碣時復存披榛陟重巘問之何代人去我亦已遠抔土
一朝封千年不復返造化相推移須臾成聚散晝夜理
亦齊賢豪終不免彭殤皆有盡寧復論修短笑歌誰與
娛當杯勿辭滿

嚴霜下林薄野雀鳴啾啾念彼客游子舉袂風修修我
有尺一書欲寄終無由揭來入我夢歡言結綢繆遺我
紫羅襦被以青綺裘欲語未及竟行矣安能留展轉不
成寐垂涕沾衾裯相思越萬里荏苒淹三秋願保歲寒
心區區復何求

白溝河

白溝河上雨一望是寒雲野曠風難定天低樹不分荒
原經百戰遺恨失孤軍更耐郵亭月哀笳處處聞

邨居雜詠

園林風景惜當年零落交游盡可憐最是東山鄭明府
奇士白頭追憶淚潸然

朱茂曙 九首

海寧潘廷章填諱

先君字子衡天啓初補秀水縣學生甲申後棄
去既卒鄉人私謚安度先生有春草堂遺橐

長洲

汪琬荅文撰墓志云君諱茂曙字子衡姓朱氏先世自吳江徙居浙之
秀水明故光祿大夫少傅兼太子太傅戶部尚書武英殿大學士贈太
傅文恪公諱國祚之孫楚雄知府諱大競之子也母曰徐安人太師文
貞公階之曾孫生母蔡氏君補縣學生數赴秋試不利最後怫鬱不得
志以卒卒於康熙二年某月某日享年六十有三當君之少也文恪公
方秉國政聲望赫然而時東南全盛吳越貴公子孫爭以結納賓客

相高或溺於聲色飲食耽好為游閑之風其最下者往往把持有司數
為人關說以夸耀其鄉黨而君皆恥不為也布衣蔬食怡然自適非雅
相故者驟見之不知其為文恪公孫也文恪公故以清慎知名於朝沒
之日家無餘貲楚雄公繼之益謹守其家法故再傳至君而其貧日甚
雖名為累世貴顯而寔則與寒士不少異為人循循儒雅篤於孝友所
交皆賢士大夫與之處者未見其喜愠而至於取予進退則又毅然介
而有節文恪公當廕一孫以子君君讓不受叔父某富而無子君次當
嗣又不受悉以推其諸弟浙江巡撫董象恒者君之友婿也或勸君往
見之君固避不往蓋其好遠權勢多此類少善屬文文恪公於諸孫中
最愛異之工行楷書能画山水竹石為董文敏公所稱性尤喜奕嘗期
故人於閩行遇善奕者與留逆旅中久之失其期乃大困而返而君亦
不以屑意也明亡意頗不自得太息曰吾老矣尚奚以諸生為哉即棄
去經史之外芻習天文醫卜諸家之書逾數十萬言盡通其術晚歲鯁
居雖書画亦屏不復為惟典衣沽酒從容從善奕者游時時寓意於奕
以自遣而已識者謂君之所志固未易可闕也配華亭唐氏禮部右侍
郎掌翰林院事文恪公文獻之孫知石屏州事允恭之女先卒卜於年
月日合葬婁家橋子孫尊慕鑿鑿玠女婿周吉亥陳忱吳周瑾先是孫
尊慕玠皆出嗣諸父後孫鑿鑿天無子於是以孫玠子德鉉為之後孫尊
好學有文今年秋與子定交京師子竊謂君之葬也孫尊宜自為之辭
如柳子厚之表先侍御歐陽文忠之表龍岡阡者以發揚先人之志而
傳示其後人庶幾可以不媿顧不自為而以屬子子則非其人也銘曰
嗚呼自君卒而浙中諸名士咸慕思之至相與立私謚曰安度先生且

謂其隱不違親貞不絕俗夫亦足以概君之生平矣傷哉斯人不可復作有崇者丘幽魄所託既固既安維千萬年維不辱爾祖以克永其傳

嘉興繆永謀天自等諡議云古者士有諱則有謚後世惟卿大夫沒而謚于朝易名之典蓋甚重矣然柳下黔婁其妻皆諱而謚之其後如

陶靖節孟貞曜之倫或謚于門人或謚于朋友蓋其行誼章章在人耳目間雖不得謚于朝猶得謚于野禮也同里朱先生子蘅高世之士其

平交執友與夫後生末學咸及見先生之風烈僉曰先生為故輔文恪公孫太守尹籲公子席處華腴固其素也布衣疏食蕭然如寒士故嘗

以文章經術見重於時矣年甫強仕流離世故遂屏絕交游堅避荒之操非其立義較然者能若是歟先生隱不違親貞不絕俗與人愉愉未

嘗見喜愠之色抑可謂與物無忤者矣考之謚法好和不爭曰安心能制義曰度宜謚先生曰安度先生 魏冰叔云先生弱冠日就婚京師

時太傅文恪公在位日侍履約獲聞中朝掌故中歲游學留都譚禮部元孩引以相助博稽舊典撰兩京求舊錄一編遇亂避地栖真寺南盜

至胠篋失去尋移渚城之西轉徙新勝塘北沈上舍駕推宅東北隅霽容閣以居抄撮韓詩內外傳章句以授門弟子生平不喜作韻語偶然

成絕句小詩輒工妙予嘗過長水拜先生墓覽汪戶部所為志銘於先生撰述削而不書爰補綴其略 王于一云先生遇人甚和而守最介

想見陶泉明居栗里司空表聖居王官谷時 沈山子云先生口不言詩觀評點文苑英華知心賞晚唐者 張子固云子蘅絕句以少勝多

詩話本生考安度府君早歲以文受知于吳范君文若既而候官曹公學佺鄭公瑄崑山顧公錫疇鎮海何公楷上虞倪公元璐崇德吳公之

屏交相賞激暇寫山水作行楷書董尚書其昌見而歎曰不出十年子當亂吾真矣家貧無析產崇禎中歲饑飛蝗蔽天人相食先妣唐孺人

率兩姊刺繡衣絮易米日趨乃炊府君絕無憂色奕譜画鑑覆局開圖不改其樂也遭亂盜劫者再青檀盡失凡九遷而定居長水敝衣破帽

口不談天下事惟與里中耆老枯棊一局濁醪數杯以消暇日詩不多作亦推燒之不復存也故所錄止此

寄王處士遙蒼

自我去城闕子亦棲畝丘一舍道豈遠鋒鏑迷所投耦

耕判沮溺闢徑違羊求凌晨起眺聽登我池北樓疎梅

吐冷豔小鳥鳴啁啾春風吹戶外念子心悠悠

外父石屏守唐公別業池上作

買斷一池水重編六枳籬露寒聞蟋蟀潮落走螭蜺柳

色陶元亮山心向子期逃禪有精舍留賦八關詩

逢錫山過叟

圍棊第一品知有過文年相值三衢市且停千里船寧
愁斧柯爛不顧燈花偏倚數本河洛問君然不然

秦淮河春游即事

橋下溪流燕尾分灣頭新水慣湔裙六朝芳草年年綠
雙調鳴箏戶戶聞春雨杏花虞學士酒旗山郭杜司勳
兒童也愛晴明好紙翦風鳶各一羣

秋曉

栖鴉樹杪啼趣織籬根語不見拗花人秋露濃如雨

鶴洲對酒

已收橋下釣復此石上酌百尺凌霄花紛紛落紅萼

牽牛花

金飈初動露華滋最愛娟娟竹尾垂多少紅樓昏夢裏

不知秋色到疎籬

周青士云梅都官咏牽牛花云花蔓相連延星宿光未收采之亦何早日出顏色休蔣勝欲曉行詞云月有微

黃籬無影挂牽牛數朵青花小蓋此花日出即萎晏起者不及觀也先生多少紅樓二語寫出花神在風露中可為絕唱

京口別元孩後登樓作

西樓昨夜露為霜楓葉新紅榭葉黃愁絕江南望江北
雨鈴風鐸正郎當

虎丘竹枝詞

懊惱墩邊花滿枝鴉頭鞵小上山遲新來嫁得兒郎偉
冷笑經過短簿祠

朱茂曜一首

先叔字子蕃天啓中補嘉興府學生承蔭入國

子監有惟木散人豪

查韜荒云先生機事都忘可狎鷗鳥然於出處進退之間毅然不苟詩取適志

不費濡削若泉林之水左右逢源

詩話先叔行第六孳孳為善惟日不足舍其田以瘞無主之骨崇禎辛巳餓莩滿野先叔屬納心上人藁葬不下數千又屬止觀上人收孩提之童于路為粥香花橋僧院所活又千餘人焦烟赤日中奔走不暇晚栖心禪悅謂人世大夢錄古今史傳及所見聞凡夢兆之可徵者號徵夢錄不啻二百卷暇則賦六言詩積累千百沒後遺藁悉亡可歎也生平嫉惡甚嚴而工于詼諧嘗客揚州有通門仕宦名在逆案者來見拒之繼以廩粟庖肉取而納諸寺中所寄空棺為文生祭之州人傳以為笑有新貴人語其客云人家子弟不可不令讀莊子只如養生生一篇文已絕妙先叔從旁曰以言莊子不若逍遙更更佳坐客皆為齒冷然胸無城府同里施處士博嘗歎曰遇子蕃于道覺滿街皆聖人

人日過伯兄貴陽守放鶴洲別業是宋朱希真園

林舊址壁上題高工部詩戲作

舊業朱三十五曾種梅花滿枝恰喜草堂人口高三十

五題詩

希真達夫俱行三十五

朱茂皖 四首

先叔字子芾號芾園崇禎初補嘉興縣學生棄

去教授鄉里有頗頌集

俞右吉云子芾父君顛公為文恪公冢子十年郎署青袍駕馬蹙蹙

長安道中晚守楚雄官署如僧舍民愛之如慈母至貧不能歸假貸于上官而後就道論者比之萬石君而廉過之則以子芾侍養佐成之也子芾補諸生以學古聞先後從諸父游長安及楚粵滇黔篁箐之區無不游歷窮年矻矻雙經糾史蠶頭細書盈尺滿笥未嘗少暇息文筆古奧深蔚淺學者不能句讀而子芾未嘗一自表著處昆弟間默默不出一論甲申後棄去不應試紗帽布衣徒步闌閭中或手自攜持菜把遇之者不知其為三公子孫讀數千卷書游涉萬餘里著書滿家者也

詩話先叔父芾園先生行第八少補學官弟子遠浮名務實學先大父守楚雄萬里從行繼又隨從祖思恩守由楚入粵周覽西南山水之勝所至以詩筆自娛及嘉興城破避兵夏墓蕩之北有故人丘岳託其子於先生而浮海入粵轉徙閩廣以死先生視岳之子如己子為之娶婦教以學文居室三楹書籍釜鬲盥盥豉蒜果雜置几案客過或自執爨集

弟子著錄者百人蘇尊亦從受業崇禎之季文尚浮華駢儷先生獨賞
嘉定黃蘊生文以稟相授既而語蘇尊曰河北盜賊中朝朋黨亂將成
矣何以時文為不如舍之學古乃授以周官禮春秋左氏傳楚詞文選
丹元子步天歌人皆笑以為迂俄而亂不可遏矣先生詩質實象其為
人

讀陶靖節集

人生兩儀中形與影相親雖曰勞逸殊好醜豈不均形
影莫贈答贈答辭苦辛賢愚等湮滅醉者詎千春衆輻
共一轂有以無為珍思慮廓然空但隨時運淪至矣柴
桑訓形影不如神

涇陽峽

峽口生暮雲峽中黯如墨柔櫓聲何多疎燈影皆匿八
月苦風波十月苦盜賊

病齒

十年化離身蒲柳零秋節上斷左右齒或脫或杌隉豈
惟廢嘯歌將欲屏麴蘖安得逢真人授我華池訣頓令
危者安粲然復駢潔乾肉及軟骨入脣便翦截免效昌
黎翁落勢崩山埒

哭王處士翔

卜居為愛一庭梅人赴重泉花未開縱使臘前風信準
任他飄落點莓苔

朱茂暉 二十首

先叔字子蓉秀水縣學生有鏡雲亭集

詩話明之詩家學杜者多學李者少學李絕句者多學李古風者少第
十五叔父雖曾選中晚唐人詩以行然心慕手追專師謫仙人者論者

謂先叔古風蕭蕭瑟瑟譬諸華流東注河漸西來伏流過峽終難得其
濬發之地或又比諸出水芙蓉天然去其雕飾其爲大雅所推挹若是

山鷓鴣詞

南北安所習風土各有宜如何鷓鴣鳥翻向燕山飛燕
山苦寒地雨雪長霏霏蒼鵝居洛陽軀體笑汝微胡鴈
自矯翼豈復銜汝歸曠然中野間日暮將何依

古風 七首

鴻鵠志千里豈顧燕雀嗤庸小委氣運安知曠士悲春
華鳥過目弦望良及時古來成功人於今知有誰荆棘
鬱相望冢土自纍纍富貴苟難期學仙宜早爲無使遂
蹉跎中心長怨追

朔風懷代馬南枝巢越禽獨我終無依動如商與參東
髮事遠游舉目徧嘔歎廓落徐泗間英風古所欽圮迹
竟冥滅流水悲餘音使我長歎息誰能明此心
桑田變滄海滄海成桑田萬事安可論天地有固然奈
何世上人白日苦喧闐奄冉以百歲身與名俱捐何知
一長暮茫茫無盡年

詰旦別親友行行辭故鄉四野何蕭條邊風生白楊不
辨車馬迹但覩荆棘場思心逐轉蓬飄飄安所將奈何
平常居使之成不祥中夜拔劍起陣星厲光芒念彼黍
離歌箕子獨哀傷

橘樹生高岡綠葉發奇色徙倚戀佳人當牕耀秋實竊
秉歲寒心歷年靡見食諒無風霜吹于何表貞質

明言總卷八十一
誰云結交易交友信獨難平生未遇時彈鋏歌苦寒一
蹈形勢迹意氣摧金蘭廉翟互盈虧田實成禍殘無故
相合離咄咄竟何歎

孟冬朔風興橘柚落華實凌晨閱場圃穡事已麤畢役
車其可休何以嗣我日雲中下鴻鴈牀下語蟋蟀黃花
既已凋田雀去何疾人生無百年上壽寧可必子有羅
裳衣曷不日鼓瑟

贈朱秋崖

廉慶金石交尹班芳蘭友傾蓋在一言相知何必久嗟
余抱嬾拙蓬蒿自甘守冰月皓虛襟雲泉共爲偶何緣
安宜生顧我獨能厚阡陌喜徑越柴關驚屢扣投我新
詩篇熒若清風瀏黃山占逸韻故人忽聚首言從攜手
來已歷丑至酉時維月仲夏連船泊皖口纜繫宵江初
話達晨星後分袂杳蹤迹相思隔南斗悠悠限百年良
晤幾迴有契闊不踰三睽違乃過九壯髮日彫謝中情
誰爲剖新知企目前且復共卮酒男兒屬有志接塵亦
何取要自踐所懷未令出處負蠡從五湖游連逃千金
壽臨風豁遐思相要期不朽

宿雲門聽竹樓寄蔣七正言

今夜宿何處雲門聽竹樓紛紛巒嶂暝个个琅玕秋芳
桂馥幽巖空泉響寒流星出梁棟明人臨河漢遊孤雲
息以閑浮子念亦休風吹野鶴起月抱孤猿愁對此達

永夜憶君徒淹留

感秋寄懷廬山高隱故人

秋氣但蕭索秋鴻日南征秋風如故人對之感我情愴
愴別緒多瀰瀰秋水盈故人五峰客抗志揚高名自欣
攜手來幾見涼飈生三秋有遺詠况乃隔生平惟應清
霜月千里同一明側耳聆虹泉俯聽驚松聲飄飄石梁
步搖曳虎溪行引領重餘想結念徒屏營

贈別黃山致言法侶還雲門

客從黃山來欲渡滄江去于越千萬峰雲門在何處致
公挺高勝攀苔從幽栖解帆樵風徑蕪火蘆洲磯期我
獻之亭皎月坐山閨何時遂攜手共登青雲梯

出邪溪由東渡橋進帆鏡湖

趁筏下邪溪溪回水凌亂指顧未俄頃雲林已改觀前
瞻羣嶺高卻睇後峰斷出口尚潺潺入湖方漫漫叢叢
烟樹分款款蒹葭散灑迤迅川風宛轉隨沙鴈蘭亭懷
右軍白洋尋賀監千載迹如存一曲情可翫

於潛舟行抵桐江

浮溪始安行登山止凌緬鬱紆倦攀陟清曠縱游衍目
對川禽飛耳接迅湍轉迴峰沓屢迷連烟晦莫辨夕翫
淹水宿晨興愛沙飯已入桐廬溪復歷富春峴雙臺峙
中江一竿垂日晚空波澄浩渺春雲澹舒卷但乘逸興
多詎覺古人遠

栗里

陶令辭折腰達生媿形役余無腰下組欣得附遺逸志
愛名山游不待婚嫁畢訪古入栗里摩挲醉翁石頽然
蒼烟中宛爾面猶識茅屋隱在望五柳共蕭瑟雲山何
渺渺巾車日將夕瓦雀鳴檐端稚子候門隙凡物良有
依孤生貴所適朗詠田園篇千載竟不隔

南園雜詩

鳥啼春晝閑雨過池草綠飛花不待風紛紛自相續靜
夜彈鳴琴湘簾隔華燭尚想慕幽人沉思亂心曲

東溪歌

二首

錦鳥迷沙日花飛一水香采蓮聲欲斷愁殺淶川長

水色明晴晝江花憶去年前溪好風月未可即回船

冬曉

氣峭霜逾緊牕明日乍紅昨宵風太甚寒葉樹頭空

送友入南岳

洞庭西望楚雲重一面衡山萬壑松後夜相思幾明月
憑君書到鴈迴峰

明詩綜卷八十二

明詩綜卷八十三

樂章

小長蘆 朱彝尊 錄

龍眠 程 仕 緝 評

慶成宴

靜志居詩話明高皇帝渡江丙午十二月命立郊社吳元年丁未圜丘
 方丘社稷壇成圜丘在京城東南正陽門外鍾山之陽方丘在太平門
 外鍾山之北社稷壇在宮城之西南洪武元年戊申正月南郊即位是
 年十一月冬至祀南郊禮成行慶成禮翼日大宴十年丁巳帝以分祭
 天地揆之人情有所未安命舉合祀之典即圜丘舊址為壇而以屋覆
 之命名大祀殿十一月始合祀天地于奉天殿詔自今以首春合祀于
 南郊十一年戊午十月大祀殿成自是命太常每歲合祭天地于春首
 至嘉靖九年因夏言之請改議分祀其詳載嘉靖祀典兩朝樂章詞臣
 分撰雜以曲譜合乎雅頌者寡今擇稍典麗者著于編慶成宴樂章十
 五年正月定一奏炎精開運之曲再奏皇風之曲三奏春皇明之曲四
 奏天道傳之曲五奏振皇綱之曲六奏金陵之曲
 七奏長楊之曲八奏芳醴之曲九奏駕六龍之曲

皇風被八表熙熙聲教宣時和景象明紫宸開繡筵龍

袞曜朝日金鑪裊祥烟濟濟公與侯被服麗且鮮列坐
侍丹扆罄折在周旋羔豚升華俎玉饌克方圓初筵奏
南風繼歌賡載篇瑤觴欣再舉拜俯禮無愆同樂及斯
辰於皇千萬年

右再奏

周南詠麟趾卷阿歌鳳皇藹藹稱多士為楨振皇綱赫
赫我大明德尊踰漢唐百揆修庶績公輔理陰陽坐令
八紘內熙熙民樂康氣和風雨時田疇見豐穰獻禮過
三爵歡娛良未央

右五奏

長楊曳綠黃鳥和鳴菡萏呈祥日麗風清及時為樂芳
尊在庭管音嘒嘒絲竹泠泠玉振金聲各奏爾能皤皤
國老載勸載懲明德惟馨永保嘉名無已太康哲人是

聽

右七奏

夏工厭芳醴商湯遠色聲聖人示深戒千春垂令名惟
皇登九五玉食保尊榮日昃不遑餐布德延羣生大庖
具豐膳鼎鼐事調烹豈僅資肥甘亦足養遐齡達人悟
茲理恒令五氣平隨時知有節昭哉天道行

右八奏

嘉靖祀典九年七月禮部議覆中允廖道南疏云慶成宴有平定天下
撫安四裔車書會同表正萬邦天命有德五舞又有仰天恩感地德之
曲載于會典或當時
詞臣所撰猶為可觀

太廟時享

詩話太廟時享春以清明夏以端午秋以中元冬以冬至洪武二年正
月定議行之迎神樂奏中和之曲初獻奏壽和之曲武功之舞亞獻奏
豫和之曲文德之舞終獻奏熙和之曲文德
之舞徹饌奏熙和之曲還宮奏安和之曲

慶源發祥世德惟崇致我眇躬開基建功京都之內親

廟在東惟我子孫永懷祖宗氣體則同呼吸相通來格
來崇皇靈顯融右迎神

承前人之德化家為國母曰予小子基命成績欲報之
德昊天罔極殷勤三獻我心悅懌右終獻

顯于幽宁神運無跡鸞馭逍遙安其所適其靈在天其
主在室子子孫孫孝思無斁右還宮

太學釋奠

詩話洪武元年二月以太牢祀先師孔子于國學八月遣官釋奠于先
師孔子五年尊孔子封號曰大成至聖文宣王六年八月翰林承旨詹
同學士樂韶鳳等上所製釋奠先師孔子樂章迎神奏成和之曲奠帛
奏寧和之曲初獻奏安和之曲亞獻奏景和之曲終獻與亞獻同徹饌
送神俱奏
成和之曲

自生民來誰底其盛維王嘉靖中
勅改師神明度越前聖柔帛具

成禮容斯稱黍稷非馨惟神之聽右奠帛

大哉聖王嘉靖中
勅改師寔天生德作樂以崇時祀無斁清酤惟

馨嘉牲孔碩薦修神明庶幾昭格右初獻

百王宗師生民物軌瞻之洋洋神其寧止酌彼金罍惟

清且旨登獻維三於戲成禮右亞獻終獻

犧象在前豆籩在列以享以薦既芬既潔禮成樂備人

和神悅祭則受福率遵無越右徹饌

有嚴學宮四方來崇恪恭祀事威儀雖雖歆茲惟馨神

馭還復明禋斯畢咸膺百福右送神

雩祀

詩話嘉靖九年禮臣等議曰月令仲夏大雩帝用盛樂春秋左氏傳龍
見而雩後世此禮不傳而在位者遇旱暵之災往往假異端術士祈禱

誣亦甚矣今請於郊兆之旁擇地以為雩壇每歲孟夏以後舉行陛下於孟春上辛既祈穀于上帝矣自二月至四月時雨而雨時暘而暘則大雩之祭陛下可免親行遣官代之若其雨澤愆期則陛下躬即其地以行禱祝其作樂陳舞宜仿古昔之儀庶於禮為不失也十一年又進議曰郊以禮為重雩以樂為主合照圜丘樂舞之數以四方之色成樂舞之服庶稱古人盛樂皇舞之制兼請三獻禮成之後九奏樂止之時命詞臣隱括雲漢詩詞別製雲門一曲使文武之士青衣執羽竝舞而合歌之乃定議迎神奏中和之曲奠帛奏肅和之曲進俎奏咸和之曲初獻奏壽和之曲亞獻奏景和之曲終獻奏永和之曲徹饌奏凝和之曲送神奏清和之曲望燎奏太和之曲祭畢使道童歌雲門之曲

百川委潤名山出雲愆暘孔熾膏澤斯屯祈年于天載

牲于俎神之格思報以甘雨

右進俎

立春特享武宗

詩話嘉靖十四年二月重修太廟立春特享九廟於武宗迎神奏太和之曲初獻奏壽和之曲亞獻奏豫和之曲終獻奏寧和之曲徹饌奏雍和之曲還宮奏安和之曲

列祖垂統景運重熙於惟武皇昭德勅威用翦除姦兇

大業弗隳專廟以享經禮攸宜俎豆式陳庶幾來思

圜丘

詩話圜丘樂章二首嘉靖初大學士霍韜撰嘉靖祀典不載殆進呈而別用他人之作也

昊天在上我祖在側我奠我幣於焉踧踖昊天在上我祖在旁我奠我帛於焉皇皇天佑皇祖錫我民祐

右奠帛

巍巍蕩蕩帝德無象無曰無象昭昭在上蕩蕩巍巍帝德無為無曰無為下式九圍服帝之德朝乾夕惕庶幾無斁帝心悅懌

右送神

升祔

嘉靖中定

詩話嘉靖十七年七月上興獻王尊諡曰知天守道洪德淵仁寬穆純聖恭儉敬文獻皇帝廟號睿宗九月升祔于廟迎神樂奏太和之曲初獻奏壽和之曲亞獻奏豫和之曲終獻奏寧和之曲徹饌奏雍和之曲送神奏安和之曲皇妣慈孝貞順仁敬誠一安天誕聖獻皇后升祔樂

酌彼鬱鬯玉瓚是將敬哉奉盈有飶其香儼皇祖在上
八聖在旁合享交歆神容洋洋

右初獻

改上成祖謚號

詩話嘉靖十七年九月更太宗文皇帝稱成祖迎神樂奏太和之曲舉冊寶奏熙和之曲初獻奏壽和之曲亞獻奏豫和之曲終獻奏康和之曲徹饌奏永和之曲送神奏安和之曲

高皇謨烈我祖是成誕垂裕于後昆孝孫是徵援今稽
古薦茲尊稱奕奕闕宮歲事有恒子子孫孫百世其承

右送神樂奏安和之曲

伐倭告祭南郊

嘉靖中撰

天啓有明百神率職殄逆助順無征不克九州奠安維

帝之德載獻載趨既齊既稷

告祭北郊

粢盛既潔齊明是將精誠感通昭格洋洋威稜贊翼我
伐用張邊燧永清海波不揚

詩話魏樂府不成於曹劉而成於繆襲晉樂府不成於潘左張陸而成於傅玄宋樂府不成於鮑謝而成於何承天北齊樂府不成於蕭愨而成於陸印皆屬恨事明洪武樂章率出四學士之筆嘉靖樂章率出議禮諸貴人之詞假孝陵改命伯温季迪永陵改命穉欽君采則其辭定遠追奚斯考父之盛不若是之懦鈍矣

明詩綜卷八十三

明詩綜卷八十四

宮掖

小長蘆 朱彝尊 錄

弟 蘇爵 緝評

郭 愛 一首

愛字善理鳳陽人宣宗聞其才召至京病卒贈

國嬪

顧玄言云貴嬪事見淑秀集其自哀古體源出蔡文姬得性情之正

京邸病革自哀

脩短有數子不足較也生而如夢兮死則覺也先吾親而歸兮獨慚予之不孝也心悽悽而不能已予是則可悼也

司綵王氏 一首

南海人宣德中女官

顧玄言云司綵宮詞道麗亦椒庭之豔發者

靜志居詩話宮官之設見于周官見于戴記漢魏置貴嬪夫人貴人此仿周官之三夫人也淑妃淑媛淑儀修華修容修儀婕妤容華充華此仿周官之九嬪也北史后妃傳有正華令則修訓曜儀明淑芳華敬婉昭華光正昭寧貞範弘徽和德弘猷茂光明信靜訓曜德廣訓暉範敬訓芳猷婉華明範豔儀暉則敬信此仿周官之二十七世婦也穆光茂德貞懿曜光貞凝光範令儀內範穆閨婉德明婉豔婉妙範暉章敬茂靜肅瓊章穆華慎儀妙儀明懿崇明麗則婉儀彭媛修閑修靜弘慎豔光漪容徽淑秀儀芳婉貞慎明豔真穆修範肅容茂儀英淑弘豔正信凝婉英範懷慎修媛良則瑤章訓成潤儀寧訓淑懿柔則穆儀修禮昭慎貞媛肅閨敬順柔華昭順敬寧明訓弘儀崇敬修敬承閑昭容麗儀閑華思柔媛光懷德良媛淑猗茂範良信豔華徽娥肅儀妙則此仿周官之八十一御女也唐宋以來參合損益不廢其名明初定設六局曰尚宮尚儀尚服尚食尚寢尚功掌以宮正總六局之事凡出納文籍皆印署之付內史監牒移于外局有四司尚宮之屬有司紀司言司簿司闈尚儀之屬有司籍司樂司賓司贊尚服之屬有司寶司儀司仗司飾尚食之屬有司饌司醞司藥司供尚寢之屬有司設司輿司苑司燈尚功之屬有司製司珍司綵司計司綵掌儲藏段疋者也官設于洪武五年王氏家南海河南村永樂二年選入宮命與權妃同輦辭曰妾嫠婦也安敢充下陳哉帝重之許歸嗚呼開創之主宮中府中設司分職各有典司后正位乎內夫人嬪御交贊陰教居有保阿之訓動有環珮之

響內無出閫之言權無私溺之授法至善矣其後宮官罷設奄寺乃得橫行王振汪直劉瑾惡已貫盈至魏忠賢攬政昵一客氏深宮更無為懿安皇后助者雖存女秀才女史官空名恒罰提鈴警夜而宮官大抵皆為奄寺之菜戶矣外而稅礦內而批紅監軍則養寇賊至則開門貽禍之烈一至於此使女官舊章不廢裨衣衾翟絳紗貂蟬雍雍肅肅何遽稱九千歲于大璫之前乎

宮詞

璫花移入大明宮一樹凝

一作旖旎

香倚

一作韻

晚風贏得君王

留步輦玉簫吹徹月明中

詩話元制歲責高麗貢美女故張光弼輦下曲云宮衣新尚高麗樣方領過腰半臂裁連夜內家爭借看為曾著過御前來楊廉夫元宮詞亦云北幸和林幄殿寬句麗女侍婕妤好官君王自賦昭君曲勅賜琵琶馬上彈明初相沿未改此孝陵有碩妃長陵有權妃也權為高麗光祿卿永均之女善吹簫宮中爭效之寧獻王詩云宮漏已沉參倒影美人猶自學吹簫王司絲亦云贏得君王留步輦玉簫嘹唳月明中皆為權貴

如作

沈瓊蓮

七首

士
瓊蓮字瑩中烏程人弘治初選入掖庭官女學

詩話魏有女侍中晉有女尚書迄于唐宋若華姊妹五人皆善屬文昭義節度使李抱貞表薦于朝德宗召入宮試詩賦兼問經史大義深加歎賞不以宮妾遇之呼為女學士貞元後宮中記注若華掌之繼而若昭若憲代司其籍烏程女子沈瑩中初入掖庭泰陵試以守宮論發題云甚矣秦之無道也宮豈必守哉泰陵大悅擢居第一給事禁中授女學士吳興人至今呼為女閣老瑩中在大內暇飼白鸚鵡教之誦尚書無逸篇此宜載之管彤者也

寄兄

疎明星斗夜闌珊玉貌花容列女官風遞一作度鳳皇天樂
近雪殘一作晴鳩鵲曉樓寒昭儀引駕臨丹宸尚寢熏鑪熱
紫檀肅肅六宮懸象魏春風前殿想鳴鑾

送弟溥試春官

少小離家侍禁闈人間天上兩依稀朝迎鳳輦趨青瑣
夕捧鸞書入紫微銀燭燒殘空有夢玉釵敲斷未成歸
年年望汝登金籍同補山龍上袞衣

宮詞 五首

翠絲蟠袖紫羅襦偷把黃金小帶輸中使傳宣光祿宴
內家學士出新除
青霧濛濛罩碧牕青燈的的燦銀缸內人何處教吹管
驚起庭前鶴一雙

豆蔻花封小字緘寄聲千里落雲帆一春從不尋芳去
高疊香羅舊賜衫
天子龍樓瞥見妝芙蓉團殿試羅裳水風涼好朝西坐

專把書經教小王

明牕斐几淨爐熏閒閱仙書小篆文晝永簾垂春寂寂
碧桃花映石榴裙

范氏一首

清江人一云新淦 桴孫女早寡選入禁中偶題画寄

意高后見之封為夫人遣還鄉

詩話明初識字婦女得舉女秀才入尚功局萬載縣志載縣民敖用敬妻易淵碧洪武二十六年舉女秀才以疾還鄉又中都左衛千戶陳泰圓妻龍玉英孀居亦女秀才洪熙元年封大樂賢母范氏殆其選也

題老嫗騎牛吹笛圖

玉環賜死馬嵬坡出塞昭君怨更多爭似阿婆牛背穩
笛中吹出太平歌

曹靜照 六首

靜照字月士宛平人泰昌元年選良家女入宮
李自成犯闕隨內監劉至南京開剃為尼

宮詞 六首

到面東風只自知燕花牌子手中持椒房領得金龍紙
勅寫先皇御製詩

一樹寒花冒雪開幽香寂寂映樓臺女官爭簇傳呼近
知是鸞宮選侍來

寶妝雲髻躡金衣嬌小丰姿傷玉扉新入未諳宮禁事
低頭先拜段純妃

口勅傳宣幸玉熙樂工先候九龍池裝成傀儡新番戲

盡日開簾看水嬉

閱遍司農水旱書君王減膳復齋居御廚阿監新承旨

明日羹湯不進魚

儉德慈恩上古稀他方織錦盡停機赭黃御服重經澣

內直才人著布衣

詩話諸詩見紅蕉集其云泰昌元年選良家入宮按慶陵在位祇一月實錄所載禮儀房長隨董國用將宮女趙永祿等八口發其親戚領去於時魏給事應嘉疏言怨女出宮古來盛德之事自穆廟至先帝兩朝凡五十餘年矣其間侍從宮人空閒無職何啻千萬數人情垂老倍思其鄉即此一事不必問有例無例慨然獨斷施行則仁慈無極言雖未見行然不聞有選良家女子之事當再考之故老野史

宋蕙湘 一首

蕙湘南京宮女年十四遭掠

題汲縣壁

風動江空鼓鼓催降旗颺颺鳳城開將軍戰死君王繫
薄命紅顏馬上來

明詩綜卷八十四

明詩綜卷八十五

宗潢

小長蘆 朱彝尊 錄

西菴 顧以安 緝評

秦藩 二人

朱敬錮 一首

敬錮字季量秦愍王棧八世孫有自吟亭詩草

靜志居詩話季量詩太淺率曩富平李孔德曾以秦藩二詩集見貽久乃失去不復再觀當更訪之

江邨雨夜

驟雨連山黑荒邨夜色侵瀟瀟霑暗壁颯颯動秋林江
鴈濕難度草蟲寒更吟愁人當此夕寂寞倍關心

朱誼斗 四首

明詩卷之二十一
誼斗字子斗秦愍王九世孫有集

詩話子斗才情橫溢極爲富平李孔德所稱覽其
祀竈千一百二十字雖未悉工而浩浙不可及也

雜詩

敬器不受盈橐籥出以虛持是律吾躬可以例卷舒澡
髮奉嚴訓兼受詩與書砥礪慎立節鄉里流歎譽世變
觸駭浪時窮遁荒墟昔爲桂與蘭今爲櫟與樗昔出擁
高蓋今行無柴車舊交零落盡羸老隨樵漁里正肆搜
括唾面不敢除內省雖不疚旁觀嗤賤愚倦焉顧墳墓
不忍捐此軀強顏留續息不絕將焉如

冬日開元寺訪子新茂之不遇

世變僧猶在城崩寺尚存終傷游客少益信法王尊欲
雪天垂暮重霾地轉昏無緣逢二妙恟况返荒邨

祀竈詩

旅食隨遷次僑居傍酒壚饕餮資釜甑炊爨立庖廚曲
突焦埃墨橫牕黷垢污水妃臨正位火德稟神符五祀
由三代諸卿暨大夫精禋煩祝史側媚矧亡俘臘月驚
春早溫風感歲徂幸存恒跼躅申禱敢踟躕汛掃勞箕
帚香燈照墜塗主人虔跽拜子姓儼奔趨白犢何年有
黃羊此地無豚肩虧博碩菟髓潤彫枯奠薦先陞竈尊
崇復奧隅硬錫黏簠簋瑣果罍盤盂裸地宜如在登天
諒不誣赫烟騰阜蓋烈燄走駢駒謁帝攀金陛朝元集
絳都奏章通太乙關請浼靈巫昭格惟聲響微情竊覲

覲干戈逢喪亂墳墓幾榛蕪樵采悲翁仲椎埋泣湛盧
孫階馴稚犬子舍保童烏日日牀邊筆年年戶左弧空
齋留破硯寒食酌芳壺別有深祈願因之切歎吁壹戎
初底定百揆待匡扶庶窺台鼎將軍戀鼓枹武功勤
遠略文教未全敷僞俗澆淳朴訛言狃誑問閭驅罔
象闌闔竄於菟怪蝎歎水過妖蛟挾浪鹿颺颺來廣漠
電雨墊平塗麥豆餘萁蔓樓臺毀墁圻劇聞填漭灞幸
不到江湖嶺嶠雖枝葉邦畿實榦株北辰當紫禁南極
邈蒼梧鄭使終歸晉山公豈患吳城階聞羽籥府藏朽
彤弧持戟頻逃伍探丸賸有徒殘邨憑賂免完堡受兵
屠城郭稀鳶鵲郊垆沸螻蛄風黃馳響馬月黑嘯封狐

濟濟寧多士盈盈燦麗姝巧鬟垂項領鞞帽綴珣瑜章
句深穿鑿衣裳侈僭踰彩毫矜不律繡袪壓諸于廢壘
招屯種新畬怕責租瘡痍兼稊稗脂髓怯鎗銖隱沒棲
丘貉飄飄泛水鳧市魁爭狡獪里正肆挪揄是事誰爲
宰斯民望愈孤中央甦混沌倏忽謝鑽刳號慟投鉞斲
神通返體膚至仁迴浩蕩大智用糶糊輿蓋還高下圓
方備楷模一元調玉燭七政順璇樞化育殷亭毒形生
盡息蘇真官辭旭殿恩詔下雲衢黃雀酬陰隙金雞宥
罪辜八風推鉅鞫二氣湊鈞爐民物更鎔鑄人才誕聖
儒九重陪舜禹六合際唐虞勲伐追伊傅文章襲典謨
經綸恢寓縣禮樂耀寰區簾業銷鋒鏑艤舫洗舳艫匝

瀛躬稼穡率土罷徵輸雪夜輕收蔡炎荒薄渡瀘蕭牆
安艷邱社稷定顓臾比屋擔珪組吞舟決網眾吳禽歸
翡翠越樹却珊瑚嘉運爭寧謐彝倫罔戮渝孔懷諧伯
仲好合共妻孥朋類堅膠漆姻聯託柿樹過庭承對問
入里應歌呼機杼家家錦耜耨處處珠醴移甘井水飴
變苦原茶綠濺沉浮蟻青乾子母蚨中州囚黷豸北海
放駒駮鸞鷲重銜籙龜龍再啓圖君臣交警戒朝野洽
歡娛粟帛兼頒賚鐘鏞畢賜醑千秋亨大有萬國信中
孚嫠婦憂忘緯終軍慨棄繻請纓傷耆老攬鏡媿眉鬚
不忍懷迷寶深愁厠濫芋向空書咄咄凌險視瞿瞿蓬
堵慚今我瓜田守故吾無能安碗礫何計出崎嶇司命

如瞪目迷魂似隕軀依稀開咐囑叱吒戒誇訐忌諱時
難觸嫌疑世所拘挈鉗他自哲躍冶爾何愚足繭防蹉
跌脣緘慎囁嚅耐寒饒契闊獻歲在斯須更始邀光寵
維新就快愉權宜綏福履次第啐屠蘇涸轍噍窮鮒歆
巢哺好雛探環驚了了啼牖聽呱呱華表晨歸鶴松門
夜訴語漸添丁熾盛全減涕沾濡道苑行舒轡詞場且
弄觚晤談來勝侶傲睨狂奴譽聞身文繡哦吟口秦
芻但拚佳興致莫恨久衰癯恍若施鍼石幡然已痛痛
引吭餐沆瀣透頂灌醍醐沅澤開融面陽林坼凍跌鶯
花催爛熳紅紫雜縈紆哀樂情非異飛潛迹固殊密雲
懸沛澤其雨斷斜晡霜戟休酣戰曦車弭迅驅會留三

舍景未照及桑榆

題旅舍

空有千金意難酬一飯恩再來逢漂母不復念王孫

周藩五人

朱安泐 二首

安泐周定王櫛玄孫

夏夜寄懷謝山人時客汾陽

良夜孤清賞懷君倍黯然客星一以別明月幾回圓紫
寒雲邊樹青山雨後天相思何處寫隨意有冰絃

送李子和山人遊西蜀

諭蜀文誰著風流漢長卿欲投巴子國定向錦官城羸

馬衝山色哀猿雜樹聲武侯遺廟在瞻謁重含情

朱睦㮮 三首

睦㮮字灌甫號西亭周定王六世孫萬曆初舉

宗正有陂上集

灌甫受禮于睢陽許先三月而盡其學年二十通五經中年築室東陂之上取古人

經解繕寫藏弄敘而傳之先是海內藏書富者推江都葛氏章丘李氏灌甫傾貲購之竭四十年之力倣唐人四部法用牙籤識別凡一萬二千五百六十卷起萬卷堂諷誦其中泝亡之後漂蕩于洪流怒濤可勝歎哉外周藩睦橫有三業詩藁又勤此南渚朝燼崇岡朝葦近岡皆有集

詩話西亭以好客聞藏書為海內第一世所傳萬卷堂書目不列卷數撰人非故籍也子家藏有聚樂堂藝文志四冊俱詳列卷數撰人係陂上鈔本曩孫侍郎耳伯筮仕祥符從西亭子竹居交契借鈔經解頗多今其撰述十存一二而已

送舜符

疇昔慕游遨與君數朝夕稍申初服懷共結沉冥跡促

膝究微言披情閱仙籍盼睐恣丘樊留連春泉石星霜
歛云變婉變成離析撫景念夙懽即事興今戚末路誰
能同素心不可易淒淒冬日黃渺渺寒流碧暫舍故園
林遠適京華陌時有北風來因聲慰岑寂

送鄭處士信之還歙因憶同游諸君子

同調日云稀憐君復遠違青山雙屐在白首一帆歸野
燒浮殘雨寒林散夕暉因茲憶疇昔相對各沾衣

荅田六深甫鄭二信之過陂上

豈是譚經所真成載酒廬竹停仙客騎花翳孝廉車乘
燭驚山鳥調琴出浦魚悠然對孤嶼宛在水中居

朱睦橫 一首

睦橫字仁菴周定王六世孫輔國中尉其子勤

此輯其詩及已作下及孫朝壘題曰三業集

送春

風吹飛絮點池蘋無那傷春又送春試上驛樓高處望
落花無主更愁人

朱勤此 二首

勤此號南渚睦橫子封奉國將軍

學仙

學仙貴養氣舉世少其真放之彌六合返則在吾身日
月卒有毀藥石寧足珍非吾好妖妄但爲知者陳巖穴
亦多誤不獨朝市人

朱仙鎮岳王祠

未遂黃龍飲金牌止渡河艱難終奉詔痛哭乃迴戈三字翻成獄千秋尚輓歌不知廊廟計何苦但求和

朱朝壻 一首

朝壻字汝升號崇岡勤此子

郊居雜興

杏花漠漠柳參參路出隋隄十里南一夜水深三十尺朝來網罟集深潭

齊藩 二人

朱慶槩 一首

慶槩字仲望高皇帝第七子博封于齊建文元

年廢為庶人永樂初復封四年奪爵安置廬州

子孫俱為庶人散居南京慶槩有籜冠集

王元美云王孫

詩能直寫胸臆不剽襲人自合古轍

秋日送李文仲訪友新安

正值悲搖落那堪送客舟白雲江上晚紅樹驛邊秋細雨潤琴幔涼風添酒籌逢迎有知己暇日即登樓

朱承綵 一首

承綵字國華齊王孫

社詩八卷金陵之者宿與四方之孝秀

皆與焉國華高帝子孫於今為庶獨以文采風流厚自標置掉鞅詩壇當甲辰中秋海內名士張幼于輩會于金陵授簡賦詩者百二十人伎女馬湘蘭以下四十人緝文墨理絃歌承平盛事白下人至今豔稱之國華詩殊清拔

送茅平仲

置酒長干路譚深夜未闌山川牽恨遠風雨逼年殘天
迴孤帆沒江空獨雁寒從茲君別去月共幾時看

魯藩 二人

朱觀燠 二首

觀燠字中立鉅野僖順王玄孫封鎮國中尉有

濟美堂橐

詩話中立好為詩雖格調卑卑亦復自
喜嘗輯山東諸家詩曰海岳靈秀集

趙康王哀詞

帝子東平侶浮名夢已殘叢臺春色冷澗水舊盟寒各
散誰彈劒花飛自繞闌茫茫天地外何處駕青鸞

送毛教授還山

未老思投老欲歸便得歸緇塵今漸遠不上芰荷衣

朱頤塚 四首

頤塚魯荒王檀七世孫封鎮國中尉

登兗州城樓

步上西城樓北望傷我心秋風吹大陸落日薊門陰玄
霜被寒渚白鴈號中林孤飛何栖止嗷嗷悲不禁怵惕
結心曲歸寫丘中琴朱絃感人意悽然發哀音中夜不
能寐撫桐獨沉吟

寄懷邢子愿侍御

相憶未相識高名空復聞時因薊北鴈一望濟南雲謝
傅青山屐羊欣白練裙風流誰可再千載獨夫君

賦得為我彈鳴琴贈王生

憐君多雅調為我彈鳴琴曠矣丘中賞兼之物外心夜深山鬼泣江淨水龍吟曲罷無人解松風披素襟

蟋蟀

蟋蟀關何事哀音入夜偏寥寥聞永漏切切亂鳴絃乍逐微風斷還從疎雨連閨中有思婦怪爾不成眠

遼藩 一人

朱術均 一首

術均字均焉簡王植七世孫輔國中尉換授鎮江通判遷戶部主事有綦組堂集

詩話明初舊典宗室子不與內外銓除後因御史李日宣等所請援祖訓換授之法言皇族宜通仕籍得旨允行寧王孫子斗詩云爵人本至

公立法無頗偏大訓手自訂百度何森然郡王有孫子所司驗才賢換授準任用升轉遵常銓諒哉二柱史抗章排拘攣先帝展科目今皇命試官椅桐委斷壑被以朱絲絃蒟騠在外殿策以珊瑚鞭蓋紀其事也天啓辛酉晉藩慶成溫穆王表桐之曾孫慎鎰始舉辛酉山西鄉試明年壬戌賜同進士出身除中書科中書舍人歷精膳主事至崇禎戊辰寧藩瑞昌王孫統鈿由進士改庶吉士累官南國子祭酒自後甲戌則蜀藩奉鈿寧藩統鈿謀璋子也丁丑則寧藩統鈿統鏗庚辰則周藩朝壘在卸寧藩統鈿癸未則代藩鼎娑廷壻寧藩統鏞議汴皆以宗支取甲科而均焉得授鎮江通判其官戶部陝西司主事曾名對平臺奏請仍設漕運總兵而思陵不允也後賊既陷秦廷臣有撤寧遠守關門之議思陵心動以問羣臣吳太常麟徵昌言撤之便而輔臣陳演力持不可而止使關門有備而漕運有兵互相聲援何至巨寇如入無人之境哉然則均焉所對亦曲突徙薪之一策也均焉詩多至數千首率爾而成不費持擇元夕詞結句與白傅歌舞屏風花障上幾時曾画白頭

人同一憤已

元夕詞

春風如箭月如梭良夜匆匆瞥眼過聽到衆中喧笑處
老年人少少年多

寧藩

七人

朱多燿 二首

多燿字宗良寧獻王六世孫封鎮國中尉有朱

宗良集

宗良鴻
聲亮節朱邸之雋

詩話宗良佳句頗多如關山曉月趨三輔鴻雁秋霜度九河太室出雲
來苑裏黃河如帶挂城頭路經軒后臨戎坂山接高歡避暑宮格調高
華惜全
詩未見

雨

觸石陰霞北嶺遙逗風寒雨入簷飄天涯故舊惟孤枕
篋裏衣裳祇敝貂綻雪蘆花紛歷歷經霜楓葉莽蕭蕭
還應撼郭濤聲急只怪空江上夜潮

塞下曲

平明飛騎扣關門漢將新收吐谷渾從此天山傳白羽
不教公主嫁烏孫

朱多炆 八首

多炆字貞吉寧獻王六世孫封奉國將軍卒後

私謚曰清敏先生有勸游橐

詩話貞吉與從兄多炆用晦竝有詩名用晦與金德甫交契王元美入
之續五子之列然其詩無足觀不若貞吉之有爽氣也貞吉好游變姓
名為來相如蹤跡遍吳越間其子謀揮亦效之變姓名曰來鯉字子魚
出游吳楚有集行世臨川湯若士為之序所傳溪樓連夜雪山縣隔年
春其警
句也

送蔡氏

為別既不易贈言良獨難小人各自媚君子乃憂歎投
漆必以膠合椒必以蘭于其寧爾心失意古所安

十四夜玩月

玉繩界西陸澄空淨如澣庭柯泣零露早見圓景滿悄
焉增永懷頓令衣帶緩四氣無終極人生一何短心悲
雍門操淚隕山陽管徂謝子山丘悽其我華館臨觴慘
不怡憂來莫能款

龍沙

龍沙駐蹕地皇祖紀南征草昧君臣定壺漿父老迎平
臨章貢水遠視灌嬰城今古雄圖在低徊落照明

對雨

苦雨何曾歇愁陰暗不開春寒緜氏嶺雲暮楚王臺戲
水飢鳶過褰簾濕燕來靜看雙屐齒無事長莓苔

別胡雲從

故侶三年隔離懷一醉銷烟花桃葉渡春草豫章橋末
路難爲別名山許見招天涯惟有夢相逐往來潮

張敘甫園中牡丹作千花賦此賞之

暮春之初天氣新日日銜杯誰主賓石家錦幃四十里
漢闕粉黛三千人清絲急管巧相聒伏雨闌風橫見陳
繁華狼籍且如此不醉恐礙花神嗔

寄黎君寔司訓

君才不薄廣文官依舊青瑣一片寒家近郵筒傳自數
地偏書籍借應難懷人夜雨蘼蕪草留客春風苜蓿盤
聞道出游堪累月祇餘山色滿吟鞍

泊長蕩

蒹葭一望暮蒼蒼長蕩湖頭烟水長怪道今朝楓葉盡
夜來七十二橋霜

朱多燠 一首

多燠字知白寧惠王第四子石城恭靖王奠堵
之玄孫

詩話南昌郭外有龍光寺萬曆乙卯二月豫章詩人結社于斯宗子與者十人知白之外則宜春王孫謀劉文翰瑞昌王孫謀雅彥叔石城王孫謀埜鬱儀謀圭禹錫謀珩誠父謀塚藩甫謀墾辟疆建安王孫謀穀更生謀聖禹卿謀剴緝其詩曰龍光社草郡人都察院右都御史掌工部尚書事徐作汝念刑部主事張壽朋冲齋序之

秋日社集

躡步出郭門涼沙朗朝日迤邐入叢林花宮眩丹漆魏

魏豫章臺萬木四排比

音必從白香山讀

高讌集友于討論及刊

述清風吹素襟古調和瑤瑟會心豈在遠快意亦多術

遥睇天際帆翩翩若風乙

朱謀埜 四首

謀埜字鬱儀寧獻王七世孫以中尉攝石城王府事既卒豫章人士私謚貞靜先生有枳園近

橐

雷元亮云鬱儀古體出入漢晉温厚典則近體頡頏初盛高渾雄麗而又弘之以典籍參之以多聞足以名家

王孫壻

戶讀書博通羣籍絕綺紈鮮腆之奉著書百十二種可比西京之劉向

楊計部曙宇載商甕漢壺千里相餉短篇志謝

古陶出古丘閔深容斗許駁犖繡土花不知幾寒暑使
君河北來載以入東楚欣然脫相贈何異獲鐘呂謂予

田詩經卷八十五
古人風因之代縞紵豈無珠玉珍雅志非其所摩挲三
歎息高誼誰當侶寘彼圖史間春秋惟爾汝

送黃貞父入覲

脂車秣良駟冠蓋如雲浮駕言趨上京述職遵諸侯王
事既有程肅肅塗路修及茲正元初奉璋覲宸旒君抱
廊廟資高視徧九州出兼卓魯聲入與夔龍游翔螭作
時雨膏澤布陵丘壇石百里城豈足長淹留揆予慕高
義夢想託綢繆賦詩申素衷踧踖翰墨儔清風播蘭蒨
令德樹千秋願崇華岱尊黃髮長優游

送姚龍文還永嘉

百卉懷芬芳當春欣所觀時風和且柔好鳥鳴其間萬
彙何熙熙我思獨盤桓良友當遠別惜此會面難握手
臨郊衢一往莫可攀願得少須臾言笑暫爲歡毋金玉
爾音慰我遲暮顏

燕至

芳草無數綠雜花相間紅誰將雙燕至一一舞春風

朱謀晉

五首

謀晉字康侯更字公退寧獻王七世孫有羔鴈

淹留蕪城中車四集

范陸之流風

王孫詩旨婉約有唐溫許宋
姚園客云康侯詩如雨

斷山青霞催月出清冷之中每成豔境
又云南昌王孫多稱詩而康侯拔出

客秦郵呈別閭使君

淮田三歲潦民已半爲魚日下司農檄星馳使者車市

烟初寂寂鄉夢亦蘧蘧
刺史今元結瘡痍可漸舒

甲寅春日江村即事

三首

水市沙墟地更偏
卑棲無用買山錢
荒廚慣乞漁家火
行李時登估客船
鐵柱江聲連野郭
香爐雲氣隔湖天
游蹤到處堪經月
豈待男婚女嫁年

綠水園亭白版扉
輪蹄出郭到應稀
江雷乍殷龍兒長
社日初晴燕子飛
飯熟東田觀午饁
酒香西舍典春衣
長堤何處無芳草
莫怨山中客未歸

江邨負郭坂田多
田舍風光草樹和
孤鳥立殘牛背雨
小魚吹散鴨頭波
買山忽被高僧笑
擊壤閒聽老父歌
猶幸代耕餘薄祿
門無胥吏夜催科

寄賀文湛持入東閣

焚魚學士最清華
五世承恩太史家
歸沐不言溫室樹
入朝時草內廷麻
吳中舊宅卑依市
都下新堤淺築沙
儻爲故人炊脫粟
青門來種邵平瓜

朱謀堦一首

謀堦字藩甫寧藩石城王孫

九日誠甫宗侯招登明遠樓
讌集分韻得無字
有約登高興不殊
天涯朋好接歡娛
寒生南浦楓初落
秋入東籬菊尚無
詩派西江存大雅
賓筵左顧敕中廚
風前剩有參軍帽
醉後終須倩客扶

朱謀圭一首

謀圭字禹錫石城王孫

秋日龍沙社集

結駟城外游春此郊原靜崎嶇陟龍沙悠然見西嶺風
日暢幽懷烟光澹雲影松門初地開清磬出禪境黃菊
籬下繁紅笑木末冷心目既雙清和歌荅佳景擾擾塵
壒中真樂誰其領

潘藩 六人

朱恬爍 一首

恬爍號振菴沁水莊和王仲子封鎮國將軍

李時

遠云振菴詩圓
熟動合矩矱

詩話振菴五言入格如雲迎芝蓋轉花傷藥欄開寒葉飛官
路霜風滿驛樓香雲飛貝葉法雨下天花不失為初唐人語

送吳平川判府致政歸桐城

歸路東風晚悽心向夕烟青山相送日白首倦游年人
渡春江上帆飛暮雨前知君投老去生事在林泉

朱恬爍 一首

恬爍號達菴沁水莊和王叔子封鎮國將軍有

達菴集

李時遠云達菴古詩近
選近體有韋柳風致

感遇

候蟲鳴虛堂明月照高樹佳人不我過相思隔雲路人
生無百齡奄忽若朝露努力求功名名成髮已素窮通
各有時達人守天賦

朱瑛 一首

理圻字純甫恬爍子封輔國將軍有玉田集李時

遠云玉田近體爽朗瑰奇

長信怨

永巷風偏入深宮月易斜空牀愁獨守中夜起長嗟託
意題團扇驚心見落花思君情不極惆悵減容華

朱理圻一首

理圻字崇甫恬爍子封輔國將軍有玉澗集李時

遠云玉澗諸體皆備簡遠華麗兼而有之

芳樹

嘉樹畫芳菲重重在春苑風來翠幄寒日映朱簾卷嫩
萼正葳蕤柔枝亦繾綣不惜與君攀無令歲華晚

朱理圻一首

理圻字京甫恬煊子封輔國將軍有玉林集

再逢友人

道遠頻馳夢情深祇寄書相逢俱淚下翻似別離初

朱效錫一首

效錫字馴甫封奉國將軍有壺峰集

夏日讌伯王園

避暑梁王苑樓深翠竹間風生三徑爽日映八牕關作
賦依芳沼開尊對遠山中林容小阮醉後未言還

唐藩二人

朱碩爍二首

碩爚字孔炎唐定王極五世孫封鎮國中尉有
南陽集

詩話南陽公子博雅工文
所為詩頗饒錢劉風致

送王山人游楚

門前楊柳樹風亂麴塵絲日暮臨溪別春帆適楚時人
烟揚子渡山木偃王祠處處生芳草悠悠千里思

郟山人子俊見過話游梁事

有客擔簦過草堂一尊風雨話游梁鴈池寂寞芙蓉冷
逢著行人說孝王

朱器封一首

器封字子厚碩爚子有巢園集

詩話子厚入弇州四十
子之列而集不見傳

游仙

劉安守天廁彼乃赤帝精左右在帝側翱翔排玉京
雲蔽丹巘五鳳啾啾鳴石階秀朱草餌之可長生舉手
謝人世爾曹等蒼蠅

益藩一人

朱常法一首

常法字幼良益端王四世孫

古怨

妾思亂如絲纏絲無斷絕難將摻摻手解得心中結

明詩綜卷八十五

明詩綜卷八十六

閨門

小長蘆 朱彝尊 錄

南屏 吳焯 緝評

靜志居詩話婦人詩集始於顏竣殷淳爰有徐陵李康成玉臺之編蔡省風瑤池之詠代如甄綜韋穀才調集輯閨秀一卷宋元以降選家類不見遺明則麗瓊之彤管遺編張之象之彤管新編田藝衡之詩女史劉之汾之翠樓集俞憲之淑秀集周履靖之宮閨詩選鄭琰之名媛彙編梅鼎祚之女士集青泥蓮花記姚旅之靈書潘之恒之白史趙問奇之古今女史无名子池上客之名媛璣囊竹浦蘇氏之臙脂璣蘭陵鄒氏之紅蕉集江邦申之玉臺文苑方維儀之宮閨詩史沈宜修之伊人思季嫺之閨秀集其文亦云富矣然青黃雜揉真贗交錯近濟南王考功士祿悉從考正為然脂集發凡起例有要有倫而予斯編亦稍糾羣書之紕繆焉

郭貞順 一首

貞順潮陽周伯玉妻明初師下嶺南指揮俞良輔征諸寨之未服者貞順從伯玉居溪頭寨作

詩上之良輔覽詩大喜一寨得全

上俞將軍

將軍開國之武臣早附鳳翼攀龍鱗烟雲慘淡遍九野
半夜捧出扶桑輪前年引兵下南粵眼底羣雄盡流血
馬蹄帶得淮河冰灑向江南作晴雪潮陽僻在南海濱
十載不斷干戈塵客星移處萬里外天子亦念遐方民
將軍高名邁千古五千健兒猛如虎輕裘緩轡踏地來
不減襄陽晉羊祜此時特奉明主恩金印斗大龜龍紋
大開藩衛制方面期以忠義酬明君宣威布德民大悅
把菜一笠誰敢奪黃犢春耕萬隴雲龍夜卧千秋月
去歲壺陽戍守時下車愛民如愛兒壺山蒼蒼壺水碧

父老至今歌詠之欲為將軍紀勳績天家自有如椽筆
願屬壺民歌太平磨厓勒盡韓山石

張紅橋 一首

紅橋閩縣人膳部林鴻外室

遺林鴻

一南一北似飄蓬妾意君心恨不同他日歸來也無益
夜臺應少繫書鴻

田娟娟 一首

娟娟工部郎木涇元經之室

慰元經

碧玉杯中琥珀光燈前把勸阮家郎不須苦憶人間世

萬樹桃花即故鄉

孟淑卿 一首

淑卿蘇州人訓導孟澄之女自號荆山居士

徐昌穀云

淑卿詩零落已多其傳者直欲與文姬羽仙輩爭長顧玄言云荆山居士之論謂作詩貴脫凡化質閨人不可有鉛粉氣覽其詩果然魚玄機之亞也

題画

嶺樹盤雲上溪迴路轉斜晚來烟靄合何處問山家

陳懿德 一首

懿德長興人移居仁和南康知府陳敏政之女

嫁同縣李昂

景泰甲戌進士

官至右副都御史

顧玄言云夫人詩集頗富句如

深院雪消芳草綠小園風過落梅多情致幽絕足為女郎之秀

閩山道中

行盡山蹊路渺茫幾家茅屋對斜陽引泉竹溜穿厨入
墮粉松花遶舍香樵徑無人閒卧犢石田初雨漸分秧
平生頗有山林癖欲向溪邊結草堂

朱妙端 四首

妙端字仲嫻號靜菴海寧人尚寶卿朱祚女光

澤教諭周濟妻有靜菴集

顧玄言云靜菴籬落見梅詩可憐不遇知音賞零落殘香對野

人或譏其以所配非偶形諸吟詠予讀其鶴賦云何美人之見獲遂羈絡于軒墀蒙主人之過愛聊隱迹而栖遲斯可謂怨而不怒矣咏虞姬云貞魂化作原頭草不逐東風入漢郊何其詞義之烈烈也

詩話靜菴詩頗流麗于歸之後移家海鹽故淑秀集明詩粹明詩妙絕俱作海鹽人

白紵詞

西風蕭蕭天雨霜館娃宮深更漏長銀臺絳蠟何煌煌
笙歌勸酒催華觴美人起舞雪滿堂清歌宛轉飛雕梁
君王沉醉樂未央臺前月落天蒼蒼

方維儀云雖乏新奇而句句鏗鏘

客中偶成

異鄉久為客風雨阻歸程兩岸數峰碧孤舟一羽輕蓬
牕殘燭在烟樹早鴉鳴坐待東方曙依稀見海城

周青士云極似

郭良曉行之作

竹枝詞 二首

西子湖頭賣酒家春風搖曳酒旗斜行人沽酒唱歌去
踏碎滿隄山杏花

橫塘秋老藕花殘兩兩吳姬蕩槳還驚起鴛鴦不成浴

翩翩飛過白蘋灘

馮銀 一首

銀字汝白瓊山人教諭源之女歸同邑唐繼祖
有孝行

詩話汝白讀顏子簞瓢陋巷舍書起而作曰吾雖居陋巷朝焉命僕以耕則有餘食矣暮焉督婢而織則有餘衣矣暇與子觀書則有餘樂矣吾其與顏氏之子同儔哉臨高王同知佐為志其墓稱其幾于知道云

暮春

綠暗紅稀春已深嬾聽杜宇喚歸音凋榮何限人間事
獨倚篷牕數過禽

鄒賽貞 一首

賽貞當塗人贈監察御史謙之女翰林編修濮

韶之母封孺人有士齋集

潘景升云孺人詩文端嚴典雅惜幼之所習長之所從皆在首

着齋中未免涉寒酸氣

詩話士齋女嫁費文憲公其詩甚庸都無林下風致

中秋有懷

銀漢無聲夜夜清良宵忽感宦游情東山遙望人千里想亦停杯對月明

潘氏 二首

氏台州人山東副使潘應昌女貢士裘致中之妻自號碧天道人有碧天道人存橐

水亭

園亭當水中兩岸蘆花沒夜久人未眠碧水蕩秋月

秋詞

翻翻黃葉落西風月滿池亭秋夜空黃菊酒香人已醉白蘋江冷渡飛鴻

茅氏 一首

氏太倉衛人陸震之母

賣宅

壁有蒼苔甑有塵家園一旦屬西鄰傷心畏見門前柳明日相看是路人

顧玄言云寡婦賣宅之作志尚端嚴

王素娥 一首

素娥號檠齋紹興山陰人歸部吏胡節節死不嫁

渡錢塘

風微月落早潮平江國新晴喜不勝試看小舟輕似葉
載將山色過西陵

顧立言云
思朗致新

陸娟一首

娟華亭人陸德蘊之女馬龍妻

代父送人還新安

津亭楊柳碧參參人立東風酒半酣萬點落花舟一葉
載將春色到江南

儲氏一首

氏泰州人大學士瓘女嫁興化舉人成學

雨後

天桃灼灼倚牕前春色繽紛帶紫烟昨夜雨聲來枕上
惜花人醒不曾眠

屈安人 三首

安人華陰人總督漕運右副都御史直之女嫁
參議朝邑韓邦靖封安人有集

詩話安人早慧十齡刺繡聞父訓諸子盡得其解尋令賦詩悉合矍度其詩康德涵序之

登江樓

登高樓子見西風吹水之潺湲水東去以不回子客思
歸其何年

送夫入覲

君往燕山去棄妾雒水旁雒水向東流妾魂隨飛揚丈

夫輕離別壯志在四方努力事明主肯為兒女傷君有
雙親老垂白坐高堂晨昏妾定省喜懼君自量珍重復
珍重丁寧須記將既為遠別去飲余手中觴莫辭手中
觴為君整行裝陽關歌欲斷柳條絲更長

述懷

自注是歲弟之燕妹歸
商親在華下余居渭北

浙浙北風起蕭蕭木葉稀寒花愁更發鴻鴈獨南飛秋
入商山裏天長渭水西思歸歸未得悵望淚沾衣

馬間卿

一首

間卿字芷居上元人少卿陳沂繼室封安人有
芷居集

苦雨

終日雨翻盆愁人欲斷魂嶺雲生屋角野水沒籬根楊
葉藏深徑梨花靜掩門聲聲偏入耳寂寞自朝昏

黃安人

二首

安人遂寧人黃簡肅珂之女修撰楊慎之繼室

封安人

王元美云夫人寄外之作用修荅和皆不及也 陳卧子
云其賦雖別自是成章 高寓公云夫人是詩才情殊勝

特嫌韻重陽字首句不如以湘字易之 郎士元送李敖

詩云莫信潮湘書不到年年秋雁過巴東亦有本也

詩話美人娟娟隔秋水杜子美句也其雨怨朝陽阮嗣宗句也黃魯直

寄蘇和仲詩用之曰美人美人隔秋水其雨其雨怨朝陽楊夫人復用

魯直語寄用修正陸平

原所云襲故彌新者

寄夫

鴈飛曾不到衡陽錦字何由寄永昌三春花柳妾薄命
六詔風烟君斷腸日歸日歸愁歲暮其雨其雨怨朝陽

相憐空有刀環約何日金雞下夜郎

方維儀云不織不庸格老氣逸

寄升菴

嬾把音書寄日邊別離經歲又經年郎君自是無歸計

何處青山不杜鵑

李玉英 一首

玉英錦衣衛人

詩話正德中錦衣衛千戶順天李雄西征陣沒遺孤五人子二曰承祖曰亞奴女三曰桂英曰玉英曰桃英諸子皆前妻所產惟亞奴後妻焦氏生焦欲圖親兒繼襲雄死令承祖往戰場尋父骸骨覲其陷于非命而承祖竟抱骨以歸焦乃鳩死承祖支解而埋之又以桂英鬻豪家為婢玉英頗知典籍年十六伶仃窮迫作送春詩云云又作別燕詩云新巢泥滿舊巢欹泥滿疎簾欲掩遲愁對呢喃終一別画堂依舊主人非焦指詩詞謂有外通等情俾舅焦榕執送錦衣衛誣以姦淫不孝擬凌遲嘉靖四年夏差太監審錄罪囚凡有冤枉人冤許行陳奏于是玉英具本託其妹桃英齎奏訟冤疏畧云臣年十二遇皇上嗣位遍選才人府尹以臣應選禮部憫臣孤弱未諳侍御發臣寧家臣年十六伶仃無

倚是以監形吟咏感諸身心寄諸筆札蓋有不得已而為言者奈何母恩雖廣勿察臣衷但玩詩詞以為外通拿送錦衣衛本官誣臣姦淫不孝擬劓罪臣在獄日久有欺臣孤弱而與不良之心者臣撫膺大慟獄中莫不驚惶臣素不才鄰里何無糾舉乃以數句之詩尋風捉影陷臣死罪臣之死固無憾十歲之弟毒藥鳩死肢解埋棄果何罪乎臣母之罪臣不敢言凱風有詩臣當自責陛下俯察臣情將臣詩句付有司委勘有無淫姦寔情推詳臣母之心盡在不言之表則臣亡父母之靈亦可慰于地下矣有旨命三法司會勘焦氏論斬玉英著錦衣衛選良才作配焉按玉英二詩本無關涉而緹帥乃坐以極刑由是推之冤獄難以悉數矣

送春

柴門寂寂鎖殘春滿地榆錢不療貧雲鬢霞裳伴泥土
野花何似一愁人

端淑卿 一首

淑卿當塗人教諭端廷弼女儒官芮儒之妻有

綠牕詩彙

章元禮云淑卿詩旨醇而節和颯颯有致

隋柳

煬帝宮中柳凋零幾度秋蟬聲悲故國鶯語怨荒丘行
殿基仍在空江水自流行人休折盡春日更生愁

斗孃 一首

斗孃松江女子嫁姚生

詩話斗孃送夫之
詩見沈津吏隱錄

送夫

遠逐風塵路遺書滿目愁思君不成寐河畔看牽牛

沈潤

卿云語
意清雅

毛鈺龍 一首

鈺龍麻城人雲南按察僉事鳳韶之女嫁少保

劉天和孫守蒙夫死誓不踰閩鄉人稱曰文貞

夫人

詩話節婦奉姑樓居不廢吟咏年七十九日無見猶使甥輩讀之句如
桃花暮雨烟中閣燕子春風月下樓詩句怕題新節序淚痕多染舊衣
裳讀之哀動頑豔

鏡

樣出秦宮製團團寶月迴虛空開物象心迹遠塵埃影
覆香羅帕先生碧玉臺繡囊鴛鳥竝珍重嫁時裁

于太夫人劉氏 一首

氏穀城人嫁府同知于玘文定公慎行母也

故城

暮雲深鎖故城春綠樹蒼烟舊白蘋昔日高樓雙燕子

定巢無處往來頻

楊文儷 三首

文儷仁和人工部員外應獬女餘姚孫陞繼室
封夫人詩附見家集

詩話孫文恪初娶于韓後娶于楊諸子登進士榜者四人太保吏部尚書清簡公鐘文中禮部尚書鉦文和太僕卿錄文秉兵部尚書鑛文融皆楊夫人教之示文融詩云何待三遷教傳經有父兄蓋謙辭也夫人精帖括斷決不爽相傳文融會試後錄其文呈母夫人笑曰淡墨雖書第一未免鬻筆似魚非文之絕品也或言夫人有鬚年過百齡云

秋日懷親

玉露沾花濕金風入幕涼
天連秋水碧山帶晚烟蒼
撫景嗟時序懷親憶故鄉
倚闌凝佇久心逐鴈南翔

采蓮女

邪溪采蓮女日出蕩輕橈
慣識溪中路歌聲入画橋

聞徵瓦氏兵至

傳聞瓦氏勇超羣萬里徵來淨
寇氛多少材官屯海畔
策勲翻仗女將軍

顧氏 一首

氏崑山人顧茂儉之妹皇甫子循之甥嫁孫僉

事為婦 何元朗云春日一詩可置玉臺新咏中

春日

春雨過春城春庭春草生
春閨動春思春樹滿春鶯

鄧氏 一首

氏眉山人訓導先健女適敘州戶部郎金寬

寄外

鎮日多愁屢廢餐
閉門獨坐遣應難
庭前別我春猶在
月下懷君春又殘
萬點落花誰著眼
一聲飛鴈獨凭闌
夢回湘簟無消息
更啓前書仔細看

王虞鳳 一首

虞鳳字儀卿候官人有罷繡吟年十七卒

春閨

濃陰柳色罩牕紗
風送鑪烟一縷斜
庭草黃昏隨意綠
子規啼上木蘭花

姜氏 一首

氏新建人廣西右布政使忻嘉靖乙丑進士女孫也嫁諸

生丁立祺

寄文學山居

何必入山深居然似漢陰
雨殘雲在竹野曠日平林
負郭多幽事為農長道心
芸牕開卷罷多是聽鳴琴

桑貞白 二首

貞白號月牕嘉興人處士周履靖繼室有香奩

詩草

詩話周逸之處士作詩不暇持擇宜其閨人亦然然紙閣蘆簾倡子和女偕隱太平之時亦樂事已

寄遠

日暮登樓強自歌
陌頭楊柳望中多
思君書劔天涯客
三月春光有幾何

春日即事

雨晴春暖百花香
戲蝶游蜂各自忙
也擬東郊踏青去
門前流水又斜陽

董少玉 二首

少玉麻城周弘禴繼室有集

戚雲雁云少玉詩居然唐調
王元美云少玉詩清

潤婉秀往往發於情而止於義有不盡為閨閣所束者
方維儀云夫人詩詞均有韻致

憶別 二首

憶別河橋柳青青
送馬蹄妾心與羌笛
無日不遼西
驛路花將發
離亭柳漫垂
凭闌無一事
日日數歸期

屠瑤瑟 一首

瑤瑟字湘靈鄞人禮部隆女年二十而夭

子夜歌

子夜夜轉長
簾前月華吐
只解歌調工
誰識歌心苦

沈七襄 一首

七襄宣城人修撰懋學女嫁屠隆子

自君之出矣

自君之出矣
孤月鑒虛牖
思君如飛花
隨風不回首

袁彤芳 一首

彤芳字履貞吳縣人參政年女自稱廣寒仙客

九日

玉露泣秋草
金風凋晚蕖
白衣三徑少
黃菊一籬疎
病減登高興
愁無寄遠書
遙知二三子
相向正愁余

王鳳嫻 一首

鳳嫻松江華亭人解元獻吉之姊知宜春縣張
本嘉萬曆乙未進士之妻有焚餘草

空閨

壁網蛛絲鏡網塵花鈿委地不知春傷心怕見呢喃燕
猶向雕梁覓主人

陸卿子 五首

卿子長洲人尚寶卿師道之女處士趙宦光之
妻夫婦偕隱寒山有雲卧閣考槃玄芝諸集

相逢行

白馬驕青雲金鞭拂紅霧相逢不問名各自東西路

擬陶

閒居寡世用性本忘華簪淥水盈方塘清風來茂林弱
魴戲漣漪野鳥鳴好音日夕時雨來白雲瀾高岑庭草
滌餘滋原野藹飛霖開顏散遙念濁酒聊自斟陳卧子云不促薄

擬李白古風

重陰翳白日陽和轉淒薄霰雪何紛揉草木盡零落長
風終夜厲棲鳥將焉託游子敝貂裘居人羨藜藿所以
商山翁高舉往巖壑

贈毗陵安美人

去年花發毗陵道美人何處拾瑤草今年草綠姑蘇臺
美人此時花下來風吹羅袂香不定流波蕩漾光徘徊

不逐行雲作飛雨夢裏鉛華學神女坐久烟霞拂袂生
回眸愁向空中舉水遠山長不見君空聞樹上黃鸝語
山居即事

披榛越宿莽背郭隱花蹊月靜妖狐泣松深怪鳥啼秋
山雲照戶春澗水穿堤飛作千尋瀑家家引灌畦

徐媛 一首

媛字小淑長洲人范副使允臨之妻有絡緯吟

姚園客云小淑詩文與陸卿子齊名然徐以綺麗勝才情稍遜于陸

別曹孃

木落西風萬壑幽忍將離思爲君留碧雞關外淒涼月
偏照蠻雲夜夜秋

文氏 一首

氏邠州三水人長沙通判在中之女嫁葛氏早
寡守節力學有君子亭集

詩話節婦爲光祿太青之姊寡居作九騷以見志九騷者一曰感往昔
二曰懷湘江三曰望洽陽四曰矢柏舟五曰楸離幃六曰傷落花七曰
臨雲歎八曰待月愁九曰撫玉鏡其辭有云觀扶光之如箭子哀歲月
其難追拾朱英而太息子時不再來悲朱顏其易改守唯寸心之不衰
辭義俱雅有古人之則

悼懷

青青山上松年華不可考灼灼園中花顏色不常好五
月鳴蜩至八月蝴蝶老感物有盛衰豈忍歸腐草

薄少君 一首

少君太倉州人秀才沈承妻

哭夫

水次鱗居接葦蕭賣魚爭米晚來嚙河梁日落行人少
猶望君歸過板橋

姚氏 一首

氏嘉興人自號青峨居士秀水范應宮之妻有

玉駕閣遺藁

詩話青峨居士詩屠緯真賞其清華流利陳仲醇尤稱之謂肝腸如雪能吟柳絮之詞志節凌霜直擬木蘭之操筆牀茶竈不巾櫛閉戶潛夫寶軸牙籤少鬚髯下惟董子及其卒藁砧哭之慟刊其遺詩及已哀悼倡隨之作傳之鄉里焉

竹枝詞

卓女家臨錦水濱酒旗斜挂樹頭新當壚不獨燒春美
便汲寒漿也醉人

范壹貞 一首

壹貞字淑英一字蓉裳吳縣人嫁吳氏有胡緇集

烟雨樓圖

烟嵐無限雨中情遠近樓臺一望平吳苑草荒麋鹿走
越江春盡鷓鴣鳴長隄柳樹迷春渚白水菰菱繞郡城
最是晚來新月下萬家燈火隔湖明

黃幼藻 一首

幼藻字漢薦莆田人蘇州府通判議之女林儀部啓昌之婦有柳絮編

姚園客云幼藻麗才雅藻何減玉臺年未四十而卒臨終猶誦殘燈無燄影幢幢之句可悲也

題明妃出塞圖

天外邊風掩面沙舉頭何處是中華早知身被丹青誤
但嫁巫山百姓家

梅生一首

生姓梅氏麻城士子周世遴伯玉妻

詩話生有逸才兼工古文辭南昌王于一向予稱之其夫周伯玉赴試
省闈生賦落葉小詩寄之伯玉省詩悽愴不入鎖院而返足以見伉儷
之重矣傳聞生有外行未免蘭形棘心曾填小曲寄情人云假若是淚
珠兒穿得起拚剪下一股青絲穿一穿寄把你于一謂古之喻淚者曰
沱若曰連如曰流泉曰垂露曰連絲曰玉箸曰縷縻曰鉛水曰日南珠
未有道及此者于一好劇譚譚必傾座斯言稍過綫不能穿淚珠本香

山句
爾

寄外

落葉滿庭階秋風吹復起遙憶別離人寂寞何堪此

馬氏一首

氏虎關將家婦有香魂集

詩話莆田宋比玉得馬氏詩集于荒邨老屋中
見芳草無言路不明之句為之擊節錄而傳之

秋閨夢成詩

夫重封侯愛妾輕漫欹珀枕戀寒更夢回遠戍相尋處
芳草無言路不明

沈紉蘭一首

紉蘭字閒靚嘉興人參政黃承昊妻有效顰集

秣陵道中風雨

剔盡寒燈風動幃長途况是客單衣無端燕子磯頭雨
一舫隨人到處飛

吳令則 一首

令則桐城人諭德應賓長女嫁生員何應瓊玉
之

憶玉之

春來草色想河關遠道縣縣不可攀翻恨白雲飛去疾
夕陽千里露童山

吳令儀 一首

令儀字棣倩令則之妹兵部侍郎方孔炤夫人
夜

新月不來燈自明江天獨夜夢頻驚長年自是無歸思
未必風波不可行

方孟式 三首

孟式字如耀桐城人大理卿大鎮之女嫁山東
布政使張秉文濟南城潰同其夫殉節贈一品
夫人有紉蘭閣集

寄任夫人

可怪睽違日相思幾換年故園芳草合南國美人偏生
死交難見悲歡意莫宣祇應三五夜明月共君圓

秋興

西風傷往事笑此客中身葉落蒼烟斷花開黃菊新天
涯蓬鬢短邊徼羽書頻蟋蟀知秋意階前鳴向人

憶舊

一別江潭月幾圓相憐人面不如前依稀舊日尋芳地
秋雨梧桐十二年

方維儀 六首

維儀桐城人亦大理卿大鎮之女適姚孫祭再
期而夭遂請大歸守志有清芬閣集

詩話龍眠閣多才方吳二門稱盛夫人才尤傑出其詩一洗鉛華歸
于質直以文史當織紵尚論古今女士之作編為官閣詩史分正邪二
集主于昭明彤管刊落淫哇覽者尚其志焉集中句若白日不相照
何況他人心中高樓秋雨時事異疇昔何其辭之近乎孟貞曜也

死別離

昔聞生別離不言死別離無論生與死我獨身當之北
風吹枯桑日夜為我悲上視滄浪天下無黃口兒人生
不如死父母泣相持黃鳥各東西秋草亦參差予生何

所為死亦何所辭白日有如此我心徒自知

傷懷

長年依父母中懷多感傷奄忽髮將變空室獨彷徨此
生何蹇劣事事安可詳十七喪其夫十八孤女殤舊居
在東郭新柳暗河梁蕭條下霜雪臺閣起荒涼人世何
不齊天命何不常孤身當自慰且免摧肝腸鷓鴣栖一
枝故巢安可忘

出塞

辭家萬里戍關路隔風烟賦重無餘餉邊荒不種田小
兵知有死貪吏尚求錢倚賴君王福何時唱凱旋
獨歸故閣思母太恭人

故里何須問干戈擾不休家貧空作計賦重轉添愁遠
樹蒼山古荒田白水秋蕭條離膝下欲望淚先流

旅秋聞寇

蟋蟀吟秋戶涼風起暮山衰年逢世亂故國幾時還盜
賊侵南甸軍書下北關生民塗炭盡積血染刀環

楚江懷吳妹茂松閣

空林隕葉暮鳥啼雲水迢迢隔皖谿夜發蒼梧寒夢遠
楚天明月照樓西

方維則一首

維則大理卿大鉉之女嫁生員吳紹忠有茂松

閣集

詩話方氏三節一為孟式同夫殉國一為維儀十七而寡壽八十四
一為維則十六而寡壽亦八十有四白圭無玷苦節可貞足以昭諸管
矣形

題竹

小院何空寂相依獨此君雪深愁易折風急不堪聞白
石移花影青苔擁籀文樓頭明月上空翠落紛紛

姚淑人一首

淑人上虞姚克俊女餘姚黃尊素配

詩話淑人年十六歸忠端當公入為御史與楊左魏李諸公早夜相過
語及羣小陰謀輒形之歎息或至泣下賓退淑人進曰公等不能先事
綢繆涕泣何益公既被逮淑人每夜祈死北辰之下願以身代逆奄就
誅賜章服三品教其子宗義為復社領袖南國諸生顧杲等公訐闡黨
阮大鍼宗義名居第三大鍼後柄用中旨逮治淑人喟然曰豈意章妻
滄母萃吾一身山陰劉公宗周嘗熟瞿公式耜皆目之曰女師詠扇之
作託物寓意不審關西
惠元孺輩曾見之否

詠蒲扇

世間物性初無定百鍊剛成繞指柔何似萑蒲經織後
能將九夏變三秋

沈宜修 二首

宜修字宛君吳江人山東副使琬之女工部郎
中葉紹素之妻有鸚吹集

感秋

月向中天迴一作人驚秋暮悲玄霜初落後一作客夢未歸
時縹緲三秋鴈蕭條兩鬢絲空餘舊簫管愁對月明吹
仲春寄表妹張倩倩

湖外青山別路長沉吟舊事總堪傷故園明月門前柳

回首春風各斷腸

商景蘭 三首

景蘭字媚生會稽人吏部尚書周祚女祁公彪
佳之配

詩話祁商作配鄉里有金童玉女之日伉儷相重未嘗有妾媵也公懷
沙日夫人年僅四十有二教其二子理孫班孫三女德淵德瓊德莖及
子婦張德蕙朱德蓉葡萄之樹芍藥之花
題詠幾遍經梅市者望若十二瑤臺焉

送別黃皆令

徵調起驪歌悲風繞坐發人生百歲中強半苦離別念
君客會稽釜不因人熱茲唱歸去辭珮環攜皎月執觴
指河梁愁腸九回折流雲思故鳥鼯鼠懷故穴帆檣日
以遠山川日以越同調自此分誰當和白雪竚立望滄

浪憂來不可絕

關山月

秋月開金鏡浮雲散碧空
風吹榆戍北露濕柳城東
影滿驚門鵲光沉起塞鴻
秦關今夜色應與漢宮同

悼亡

公自垂千古吾猶戀一生
君臣原大節兒女亦人情
折檻生前事遺碑死後名
存亡雖異路貞白本相成

項蘭貞 一首

蘭貞字孟畹秀水人貢生黃卯錫之妻有裁雲

月露二草

送外赴試

柳陰輕綰木蘭舟
杯酒殷勤動別愁
此去但看江上月
清光猶照故園樓

顧若璞 一首

若璞字和知錢塘人副使黃汝亨子茂梧之妻
有卧月軒橐

宮詞

垂柳千條拂御墀
涼風初到影蛾池
銀箏玉笛花前奏
不唱班姬團扇辭

張倩倩 一首

倩倩吳江人沈秀才自徵之妻

憶舊

故人別後杳沉沉，獨上高樓水國陰。
鴻鴈不傳千里一作恨，天涯流落到如今。

沈憲英一首

憲英字惠如，一字蘭友，吳江人。沈自炳長女。

悼宛君姑

樓上春深乳燕來，半簾花影自徘徊。
子規聲裏黃昏月，叫斷東風夢不回。

葉紈紈四首

紈紈字昭齊，吳江人。葉紹袁之女，歸袁氏，有芳

雪軒遺藁

暮春赴嶺西道中作二首

故園別後正春殘，陌上鶯花帶淚看。
何處鄉情最悽切，孤舟日暮泊嚴灘。

烟樹重重失故鄉，雲山極目恨偏長。
不知何日是歸日，杜宇聲聲最斷腸。

秋日偶題

一番搖落一番嗟，咫尺天涯夢裏家。
莫道秋來不憔悴，滿庭都是斷腸花。

哭妹

牕花寂寂蕊初寒，誰向簾前握手看。
風景不知人有恨，月明依舊畫闌干。

葉小鸞二首

小鸞字瓊章一字瑤期吳江人紹袁季女未嫁
而天有疎香閣遺集

已巳春哭沈六舅母墓下

十載恩難報重泉哭不聞年年春草綠腸斷一孤墳
哭姊

雲散遙天鎖碧岑人間無路月沉沉可憐寒食梨花夜
依舊春風小院深

祁德淵 一首

德淵都御史山陰祁彪佳女嫁姜廷梧桐音

送黃皆令

西風江上鴈初鳴水落寒塘一櫂輕遶徑黃花歸故里

滿堤紅葉送秋聲片帆南浦離愁結古道河梁別思生
此去長塗霜露肅何時雙鯉報柴荆

張德蕙 一首

德蕙字楚纒山陰人諭德元怵之孫嫁祁公子
理孫奕慶

中秋

秋氣中天淨愁人獨夜看停橈江愈闊却扇月初寒霜
入桐陰薄風飄桂影殘扣舷情未已露濕綺羅單

朱德蓉 二首

德蓉字趙璧山陰人太師燮元之孫嫁祁公子
班孫奕喜

送黃皆令

青青楊柳枝飄搖大道旁大道多悲風游子瞻故鄉執
杯送行客淚下沾衣裳憶昔弭遠權明月浮景光壺觴
極勝引歌舞開華堂好鳥得其侶舉翼齊翱翔膠漆兩
不解金石安可方分袂起倉卒永夜生爽傷吳山何渺
渺越水亦茫茫芙蓉被秋渚采采有餘芳願言贈所思
曰歸紉為裳

上已

桃花新水浣春衣舊日蘭亭到亦稀斷岸羽觴晴日暖
遠山橫笛暮雲飛沙棠舟近江鷗起玳瑁梁空海燕歸
尚有采蘋思未定不堪月色上羅幃

黃修娟 一首

修娟字媚清仁和人參議汝亨女

邨居即事

寂寂邨居晚迢迢旅鴈稀煙花迷曲徑山月澹清輝黃
菊經霜淨秋萼帶雨肥夜深寒漏徹漁火逐星歸

項珮 二首

珮字吹聆秀水人處士吳統持之室有藕花樓

詩彙

詩話吳處士巨手有大宅在北郭之秋涇得吹聆為嘉耦琴瑟靜好詩
篇酬和甚樂也遭亂家破轉徙無定跡糠粃不飽然未嘗聞交謫之言
所題已齋即秋涇故居取方廣胸前字以為曲闌鄉人題詠者紛紛惟
吹聆詩俱從梵夾中出極其熨帖或疑六字韻書不收然三點成六猶
有想六即伊字苑舍人咸詩可據也

夫子書屋落成闌干皆用卍字遂名曰卍齋屬
賦四十字

夫子愛奇字迴闌繚繞之一時齊作卍三點不成六樹
色春浮竝齋居繡佛宜定知人載酒送喜有芻尼

社日

過雨春泥白斜飛燕尾纖恰停鍼綫坐自起為鈎簾

翁

桓

一首

桓字少君錢塘人處士胡介妻

重過西湖

風風雨雨鳥空啼草綠山腰水滿隄画閣已傾歌舞散
十年重到六橋西

姚媯俞 一首

媯俞字靈修長洲人嫁嘉定侯演有再生餘事

冬日

坐擁烏皮倚隱囊且翻梵夾靜焚香淒淒庭院悲風急
漠漠江天朔鴈翔一段旅懷還磊落百年心事付蒼茫
登樓望遠迷鄉樹又見寒鴉送夕陽

章有渭

二首

有渭字玉璜華亭人嫁嘉定侯泓有燕喜樓草

舟行即事

曉霧迷離彩鷁輕櫂歌徐動見新晴臨湍鷺子亭亭立
夾岸蒲花漫漫生遙指小山遮塔影忽經深樹出鐘聲

晚涼不覺羅衣薄自愛澄湖片月明

春感

舞蝶莊生夢啼鷓蜀帝魂紫芝逢勝友芳草想王孫
小閣聞雞唱閑庭聽鳥喧曉烟迷麥隴春霧鎖柴門
魚戲青萍動風吹碧葉翻綵毫題玉柱綠蟻引金尊
乍摘葳蕤草長依翡翠軒避秦無絕境何必問花源

盛韞貞

四首

韞貞字靜維華亭人

邨居雜感

三首

自我來茲地重門曉夜高蕭條門外柳幾度向人青
采蕨懷商土占時望歲星但能安病骨不必問池亭

烽火吳關遠烟花谷水明孤墳應宿草白髮隔重城
遺行書難就玄言較未成愁心託幽夢茲夕倍縱橫
蓬徑無人迹春廚斷暮烟稻梁謀自拙僕隸義相捐
薄俗終難入幽棲性自便尺書兼斗粟慙媿主人賢

寄兄

一自雙親盡鄉園不忍旋七年三見面稚子漸齊肩
夢斷燕山月春歸海樹烟書來能念我三復鵲鴿篇

姚

淑

一首

淑字仲淑金陵人庶吉士達州李長祥納為繼室
有鍾山秀才海棠居集

寄研齋太史

年年歎離別此別何時休樓頭望不見從今不上樓無
錢買鯉魚君書何處求

倪仁吉 二首

仁吉字心惠浦江人進士仁楨之女

宮意圖

調入蒼梧斑竹枝瀟湘渺渺水雲思聽來記得華清夜
疎雨銀缸獨坐時

彈琴

梨花小院午風輕謾理冰絲入太清一片梧桐心未死
至今猶發斷腸聲

錢敬淑 一首

敬淑字師令江寧人文學談允謙之妻

泊浦子口

殘年孤櫂泊近浦驗歸程雪圃芹牙白江醪竹葉清夕
陽新別路衰草古離情隔岸寒山色含悽望舊京

湯文玉 一首

文玉

司吾春游詩

山雨初晴洗佛螺春風處處揭青莎采香不倦溪邊路
多少飛紅趁鞦韆羅

周淑禧 一首

淑禧江陰人周榮公第三女

詩話至元斥賣廣濟庫故書有采畫本草一部近吳中趙凡夫子婦文
俶端容設色畫本艸曲臻其妙江陰周榮公二女淑祐淑禧臨之亦成
絕品淑禧寫大士象一十六幅陳仲醇謂其十指放光直造盧楞伽吳
道子筆墨之外今文俶真蹟尚有存者周氏姊妹花草見者罕矣又石
城女子李侗那善画
水仙則余亦未之見

杜康廟

醕有新糟釀有醅杜康橋上客題詩最憐苦相身為女
千載曾無儀狄祠

詩話海內圖經罕載杜康祠宇獨三吳有之相傳康有遺冢在江陰縣
城南土人因於橋下建祠以劉伶配之季給事科草募疏云詩傳雅詠
先歌既醉之章書有誥辭特謹德將之訓溯麴蘖流傳既遠而古今風
味攸同酒星在天醴泉出地舟中之解三百市上之價十千爰有飲中
八仙竹林七子或沉或酒孰聖孰賢緬懷作醴之功豈止忘憂之具今
杜氏之遺橋尚在而劉家之故巷猶存閱歲久而年深為風侵而雨剝
茲欲樹豐碑之七尺翦棘誅茅建祠屋之三楹崇基壘石俾千載相傳
為勝事賴一時共濟以落成文頗流利然不若淑禧一絕之新警也

紀映淮 二首

映淮字阿男金陵人嫁莒州杜氏早寡守節終
絕句

杏花一孤邨流水數間屋夕陽不見人牯牛麥中宿

秦淮柳枝

栖鴉流水點秋光愛此蕭疎樹幾行不與行人綰離別
賦成謝女雪飛香

謝五孃 二首

五孃萬曆中湖州女子有讀月居詩

小園即事

翠竹青梧手自栽芙蓉未秀菊先開小軒睡起日卓午
黃葉滿庭山雨來

感懷

四面簾垂碧玉鈎，重重深院鎖春愁。
天涯行客無歸信，花落東風嬾下樓。

曹壽奴 三首

壽奴小字山姑，崇禎間吳興女子，有觀靜齋橐

詩話壽奴詩頗有林下風致，贈姊一篇其源出於楊方。

贈伯姊

草有竝蒂花，木有連理枝。果有合歡核，豆有同根萁。
魚或比目游，鳥亦比翼隨。同功繭作絲，合卺玉為卮。
我與子姊妹，願得不相離。出必同車輪，居必聯屋楹。
見月每共拜，弄珠定雙嬉。子妝我掠鬢，子盥我捧匜。
我衣擣子砧，子濯汙我私。機張我續織，鏡聽子兼持。
子褰我衾裯，我舖子粥糜。寒輒擁子背，暑還扇我肌。
子女迭相抱，帷帳恒竝施。生從比肩人，沒以百歲期。

夫君北行以菩提數珠留贈

百八菩提子，紅絲貫小纓。無眠他夜月，留記遠鐘聲。

寄外

去作西湖十日期，經年猶滯謝公池。
別來夜夜雙行淚，只有珊瑚舊枕知。

李因 一首

因字是菴，會稽人。一云杭州人。光祿卿葛徵奇之妾，有

竹笑軒吟草續橐。

詩話是菴善画花竹之天斜禽鳥之跳躑具有生動之趣刻沉香爲像以奉白陽山人詩其餘事爾然無鉛粉之飾

郊居用松陵集韻

避世牆東住牽船岸上居雨分三徑竹晴曝一牀書上
坂驅黃犢臨淵網白魚衡門榛草遍長者莫停車

黃媛貞 四首

媛貞字皆德秀水人先世父貴陽守副室有卧

雲齋詩集

俞右吉云亡友黃鼎平立二妹一字皆德一字皆令均有才名皆德爲貴陽朱太守房老深自韜晦世徒盛傳皆令之詩画然皆令青綾步障時時載筆朱門微嫌近風塵之色不若皆德之冰雪淨聰明也

丁卯冬十二月留別妹皆令

北風悽以栗不忍吹羅襟高雲語征鳥離思兩難沉今
我遠庭闈與子分芳衾寧忘攜手好所以傷我心一言

一回顧別淚垂不禁但得頻寄書毋使相望深

聽雨

長夜一燈炮獨愁誰與言牕前幾點雨井上芭蕉翻

山邨

春山春水碧依依草屋風輕燕子飛行到半坡亭小住
野雲何事亦來歸

貴陽解中

天涯二月早芳菲官舍何曾遠翠微如此溪山堪累月
杜鵑猶道不如歸

陸氏 一首

氏華亭夏考功允彞侍妾

追悼

錦瑟蒼涼憶舊蹤
芳年行樂太怱怱
濃香簾幕圖書靜
明月樓臺笑語通
人竝玉壺丘壑裏
才分采筆黛螺中
祇餘華表魂歸去
夜夜星辰夜夜風

徐簡簡 三首

簡簡字文漪嘉興人
休寧吳璵小妻有珮蘭閣

草夢居集

詩話文漪緣情有餘風
格未老然亦閨中之秀

宮詞 二首

沉香亭子玉勾闌
遍植名花按月看
第一莫裁紅芍藥
此花開日定春殘

庭院沉沉盡日扃
自將書法學蘭亭
中官領得芙蓉粉
催入長春寫御屏

寄懷

夾岸垂楊卷落花
春風咫尺是天涯
重門深鎖樓中燕
獨有王孫不在家

江娥 一首

娥宗室來鯤侍兒年十三能詩

戊戌除夕守歲和王孫作

仙茆筆秃硯成冰
守歲無聊寢復興
柏葉酒香餅已罄
小牕留得隔年燈

朱大韶婢 一首

題壁

無端割愛出深閨猶勝前人換馬時他日相逢莫惆悵
春風吹盡道旁枝

詩話華亭朱吉士大韶嘉靖丁未進士性好藏書尤愛宋時鏤板訪得
吳門舊姓有宋槧素宏後漢紀係陸放翁劉涓溪謝疊山三君手評飾
以古錦玉籤遂以一美婢易之蓋非此不能得也婢臨行時
題詩於壁吉士見詩惋惜未幾折館于聞之李高士延是云

明詩綜卷八十六

